

IN LAUDES
ORDINIS MINIMORUM
ORATIO

ADNOTATIONIBUS ILLUSTRATA
DICTA FLORENTIÆ
PRO SOLEMNI
COMITIORUM GENERALIUM
CELEBRATIONE



ROMÆ MDCCLXIV.

EX TYPOGRAPHIA MARCI PALEARINI

PRÆSIDUM PERMISSU

CITY OF

CHICAGO

OFFICE OF THE

COMMISSIONER OF

THE CITY OF

CHICAGO

(III)

EMINENTISSIMO , AC REVERENDISSIMO PRINCIPI
CAROLO REZZONICO

CARDINALI AMPLISSIMO

SANCTE ROMANÆ ECCLESIAE CAMERARIO
ORDINIS MINIMORUM PROTECTORI BENEVOLO

FR. JACQUIER EX MINIMORUM FAMILIA



ALIERIQUE Scriptores qui magnis
Virorum Principum nominibus
libros suos nuncupare atque dedicare au-
dent , varias cur id faciant rationes cau-
sasque longiùs accersere atque , ut ità di-
cam , emendicare consueverunt . Ego ve-
rò EMINENTISSIME PRINCEPS , qui hoc
opusculum , te Auspice , in lucem emit-
tere confido , supplicibus prolixioribus-
que verbis quibus me excusatum ha-
beas , vix indigere mihi videor . Hujus
libelli argumentum te patronum invocat
sibi que

sibi que proprio veluti jure vindicat. Agitur enim de Familia nostra cujus Patrocinium suscepisti, & pro tua in Nos propensissima voluntate, & pro singulari ex nostris Annalibus nostrisque animis nulla die obliterando beneficio SS. Patru tui CLEMENTIS XIII. Pontificis Maximi, qui Ordinem nostrum tam præclaro honore augere amplissimoque munere cumulare voluit. Agitur de Generalibus nostræ tuæque Familiæ comitiis quibus præesse, pro suprema Patris Protectorisque auctoritate tibi competit. Agitur tandem de illustrioribus Societatis nostræ hominibus ex quibus Ordinis quem tuo impensè foves patrocinio, specimen aliquod capere liceat, tuamque in nos propensionem, non dicam, amplificare, sed maximam quantam habes conservare atque sustinere. En paratissimam, si necessaria sit, hujus meæ confidentiæ excusationem. Quid ergo rationes alias persequar? quid implorabo summam humani-

manitatem illam , morumque suavitatem qua in splendidissima dignitate constitutus , omnium corda tibi facile devincis ? Quid loquar omnibus notissima quibus præfulges virtutum ornamenta ? Quid tandem celebrare necessum est ab antiquo deductam gentis tuæ nobilitatem , cui decus immortale , & Sacra Majestæte & virtutum omnium gloria addidit CLEMENS XIII. quem diù sospitem Deus atque incolumem servet. Verùm quamvis hoc meum opusculum , quod aliquo modo tuum quoque dici potest , cum ad res nostras pertineat , vix ullam protectionem a te postulare videatur, ego tamen deprecandæ veniæ necessitatem vehementer sentio qui argumentum, neque pro tua neque pro rei ipsius dignitate, tractaverim. Cæterum hanc oblatam optatissimamque occasionem amplexus sum atque arripui libentissimè significandi venerationem maximam qua sacram deosculatus Purpuram me tibi E. P. , devotissimum atque obsequentissimum profiteor .

ADPROBATIONES

JUssu Reverendissimi P. Thomæ Augustini Ricchinii S. Palatii Apost. Magistri legi Clarissimi viri R. P. Francisci Jacquier in Romanæ Sapientiæ Archigymnasio Philosophiæ Matheseosque Professoris; quin & celebriorum Europæ Academiarum Socii, librum cui titulus: *In laudes Ordinis Minimorum Oratio adnotationibus illustrata*; atque in eo libro eruditissimus Vir præstantissimas sodalium suorum virtutes, sui que Ordinis egregia in Christianam Rempublicam ac litteratos homines merita ita exponit & demonstrat, ut cum ad fidei morumque normam, tum verò ad sanioris critices regulas, atque ad Auctoris celebritatem, omnibus modis respondeat. Quamobrem typis edendum censeo. Dabam Romæ vi. Non. Martii 1764.

F. Gabriel Fabricius
S. Theol. Lector, Ord. Præd.

I M P R I M A T V R,
Si videbitur Rmo P. Mag. Sac. Pal. Apost.
D. Archiep. Nicomed. Vicefg.

I M P R I M A T V R,
F. Th. Augustinus Ricchinus Ord. Præd. S. P. A. Magister.

LECTORI




SI Notis atque Commentariis illustrare liceat Orationis genus aliquod, illud sanè est, laudativum nempè, quod mihi tractandum contigit. Neque laudare mihi propositum est unum duntaxat illustrem virum, cujus quidè laudatio breviori sermone concludi posset, sed Religiosæ familiæ gloriam a trecentis circiter annis longiùs repetere & per temporum seriem persequi aggredior. Quæ cum ita sint, nemo non intelligit tantam hominum, virtutum, Regionum temporumque diversitatem, intrà uniùs Orationis limites contineri minimè potuisse. Itaque cum Orationem hanc in lucem prodire exoptaverit summus Ordinis nostri Moderator, cujus voluntas mihi pro imperio est, solemnì comitiùrum nostrorum celebritati opusculum hoc exhibere atque offerre nolui necessariis destitutum adnotationibus quæ & laudes vix delibatas amplificarent, & cœtum nostrum in splendidiori lumine collocarent,

At eos qui hunc meum qualemcumque libellum suâ attentione non omninò indignum judicabunt, monitos volo, servatam non fuisse, in recensendis hominibus nostris accuratam temporum rationem; talis siquidem Annalium Ordo ipsam virtutum meritorumque seriem, ipsum quoque Orationis Ordinem perturbasset omninò. Eandem ob causam, Provinciarum varietatem, Clarorum Virorum patriam haud studiosè conquisi vi atque notavi; cum enim Institutum nostrum in universum commendare illiùsque laudes celebrare mihi proposuerim, nihili aut parvi interesse

exi-

existimavi, si Provincias Urbesque distinguerem: *Omnes fratres sumus*: communi matre, scilicet Religione geniti. Tandem quod attinet Virorum illustrium mortem, tempus quo ipsa contigerit aliquando prætermisi; ubi id nullius utilitatis mihi visum est; satis enim mihi erat haud interruptum familiæ nostræ splendorem indicare atque demonstrare; neque rem accuratiori Chronologiâ Annalium more consecrari hujus libelli scopo conveniens fuit. Nihil jam reliqui est quod moneam nisi me haud magnâ diligentiam vocabulorum mutationi studuisse, ubi de iisdem virtutum meritis frequens recurrebat sermo. Si enim id facere voluissem, quod quidem haud difficili præstitissem negotio, affectato facile peccatum esset scribendi genere, atque etiam fortasse obscuro. Cæterum id exopto vehementer ut quod leviter tantum extremisque, ut dicunt, digitis attigi, aliquis majori studio amplectatur, universamque Ordinis nostri historiam datâ operâ, meliorique labore perficiat.





ORATIO

SI quis unquam inexpectatus, magisque expetendus honos contigisse mihi potuerit, ille profecto est, ornatissimi atque religiosissimi PP., quo me hodiernâ die, exornatum atque amplissime cumulatum intelligo. Ecquid enim præter omnem spem atque expectationem accidere potuit mihi nullius umquam inter nos dignitatis? quam quod in hac tantâ gravissimorum Patrum frequentia & celebritate, in loco auctoritatis pleno solemnem sermonem habere concessum fuerit. Ecquid magis exoptandum quam lætissimam hanc insignium virorum coronam intueri, præclarissimam Ordinis nostri imaginem propius contemplari atque admirari? Quid tandem mihi in votis atque deliciis magis esse potuit? quam protrahere, quantum in me est, fortunatissimum illud tempus quo suavissimâ optimi atque amantissimi moderatoris nostri, mei, serè dicam, patris præsentia me recreatum atque beatum sentio. Sed heu! pro variâ rerum humanarum conditione, prosperis adversa, tristia letis intercurrunt. O diem non satis deplorandam quâ dulcissimum hoc vita

A

mea

mea solatium, rerum mearum consilium atque praesidium mihi jamjam eripiendum esse vix cogitare possum. Illius erga me singulari benevolentia, sine ullo quidem meo merito, id omninò debeo, ut alia omittam beneficia sanè multa, quod in conspectu vestro. C. PP. dicere atque inter vos assidere licuerit.

Neque aliquem vestrū esse arbitror in me ità injuriosum ut male suspicari possit, me tanti beneficii magnitudinem, vestram omnium, quotquot hic adestis, sapientiam, meam verò tenuitatem atque infantiam ita oblitum esse, ut vos prudentes viros, dignitate ornatos quā vos estis, de officio admonere atque praeceptis instruere audeam; quorum alterum dementia esset, arrogantia alterum intoleranda. Quae cum ità sint, cogitanti mihi quid vobis gratius, quid huic loco opportunius, quid committorum universitati convenientius dici posset, id in mentem venit illustriores familia nostra homines breviori sermone recensere, ordinisq; nostri laudes non verbis amplificare, sed, pro orationis modo, strictè attingere. Neque enim existimetis hoc mihi esse propositum, per universos annales nostros, per singula virorum illustrium nomina, per omnia virtutum officiorumque genera pervagari. Nam praeterquam quod tantam rerum copiam & varietatem complecti non posset oratio; si tot homines virtutesque appellare vellem ac distinguere, historicum agerem, non oratorem. Jam verò attentionem vestramque in me propensionem postulare supervacaneum judico, quum quod nemo non sit in hoc praclarissimo cætu, ut valde confido, mihi benivolus, tum quod comparatos ad audiendum animos sibi faciat nobis omnibus communis argumenti utilitas, atque dignitas.

Ea est Religiosa praesertim Societatis constitutio atque perfectio, ut magna quantumvis hominum multitudo, ex tam diversis tamque discrepantibus provinciis ac nationibus conflata, in unam veluti familiam atque domum summā animorum consensione coalescere debeat; quod quidem fraternae caritatis &

con-

concordiæ vinculum cum firmissimum inter nos omnino vigeat nunquam abrumpendum, illudque sit Ordinis nostri stemma Gentilitium (1), nobilissimum sanè & divinum, unam omnium gloriam esse, immò & nos singulos in solo Deo gloriari facile mihi persuadeo. Verum si, prout est maligna ingenii humani natura, religiosis etiam animis adhaerescere possit subtilissimus invidia putvisculus, hæc sanè labe nobis minimè metuenda; cum magnos viros ità prædicare possit Natio qualibet ut altera alteri non invideat, atque nulla sit Provincia quæ, comparatis libratisque virtutum meritis, primo secundove aut alio quolibet loco numerari debeat.

Trecenti jam ferè anni fluxerunt, cum SS. Parens nascentis Familiæ fixit incunabula Paula in Calabriâ immortalis sanè nomine celebrandâ, quod Patri & filiis communem ortum dederit (2). Prima quidem Ordinis nostri initia non virtutum rudimenta, sed exempla atque documenta existerunt; austerrum vitæ genus humanis viribus vix ferendum, Dies rerum divinarum contemplationi religiosisque exercitiis consecrata, angusta domus, suppellex misera; hæc fuere primæva ornamenta, hæc fuit pristina gloria; sibi metipsis velut emortui Deo soli vivebant Societatis nostræ viri. A Deo quidem & ab Jove, ut vulgò dicitur, principium; verum ea est ardentioris caritatis amplissima vis, ut non nosmetipsos duntaxat sed alios quoque & commune bonum latissimè contineat atque complectatur. Quamquam verò illud sit Christi Domini præceptum, id tamen expressâ lege repetere nobisque inculcare voluit Franciscus divina caritatis igne totus inflammatus, ut minimè neglectis litterarum studiis, non morum innocentiam duntaxat & vitæ exemplo, sed verbis quoque ac documentis, sine ullâ tamen ingenii & doctrinæ ostentatione, aliis præluce, pro viribus nostris (3) satagamus. Et requidem ipsâ, in viro religioso pietatem tolle, facis prophanum hominem; tolle doctrinam, ejus pietas ut plurimum

rimum superstitiosa est atque pernicioſa; tolle tandem opera aliis navanda voluntatem, ſegnem illum facis atque otioſum. His tribus dotibus floruiſſe familiam noſtram, eamque viris pietate primum quod caput eſt, dein doctrinâ, tandemque navatâ Eccleſiæ & litterariæ Reipublicæ operâ celeberrimis abundaſſe ex ordine demonſtrabo.

Si annalium noſtrorum monumenta evolvamus, ab ipſis quoque antiquis temporibus primisque fere natalibus, reperire eſt non ſolum ſanctiſſimos, ſed doctiſſimos etiam viros, fidei religionisque præcones eximios, ſtrenuos propugnatores quorum alii laboribus Evangelicis deſatigati lentius obierunt, alii autem a Religionis hoſtibus vexati & ſaviffimè trucidati, celerius ad vitam æternam immortalemque gloriam evolaverunt (4). Anguſtioribus Calabriæ finibus circumſcripta diù non fuit religioſiſſimi Inſtituti utilitas. Perlata per omnes longè latèque regiones B. Fundatoris fama brevi effecit ut Provinciæ, Regna, Regeſque ipſi, Franciſcum ejuſque ſocios certatim habere voluerint iteratiſque precibus tandem inpetraverint (5). Effingamus nobis animo atque contemblemur, ſi fieri poſſit, Franciſcum qui moribus, veſte, totoque mentis & corporis habitu ſimplicitatem candoremque ſpirabat, in ſplendido aularum tumultu tranquillum, religioſum, purioris cultûs reſtitutorem, ab ipſis Principibus ac Regibus Majeſtatis ſuæ ſerè oblitis ſingulari veneratione exceptum; eum tandem intueamur a Summis Pontificibus benignè atque honorificè admiſſum (6); nullus proſectò Religioſus Ordo illuſtiora oſtentare poterit initia; atque eo quidem ſplendidiora quo ſibi ipſi obſcurior fuit vir Sanctus qui ſibi ſoli nullus, nihil prætermittebat ut ab aliis quoque nullus haberetur. O glorioliſſimum ſanè Ordinem noſtrum Paternæ hujus virtutis hæredem! Et requidem ipſâ, ſi illuſtrium virorum, qui certè inter nos fuere multi, religioſè geſta noſtris monumentis conſignata repetamus, aliquos inveni-

re

re est Principum gratiâ & beneficiis invitatos qui religiosos ob-
scurosq; angustioris domicilii parietes, ædium dignitatumque
splendori anteponere non dubitarunt. Nullum certè inter nos
reperire est magni nominis virum qui tractandis prophanis civi-
libusque negotiis sese ultrò obtrudere paratus fuerit, qui ad
sacras dignitates ambitiosè malisve artibus obrepserit, qui ve-
ram sinceramque ex demissâ sui ipsius opinione conceptam mode-
stiam intimo animo non servaverit (7). Neque enim præclaro
modestia nomine digni sunt, sed contrà subtilioris atque exquisi-
toris superbiæ rei qui fastum calcant, sed alio fastu. Hæc rarior
morum ingenuitas nec satis laudanda majorum nostrorum simpli-
citas in causâ fuit, cur nobis in Galliâ hæserit honorificentissimum
quidè virorum bonorum cognomen, quo nullum apud iniquos
virtutis honestatisque æstimatores vilius habetur atque ignobi-
lius, quo nullum ~~in~~ ⁱⁿ ~~est~~ ^{est} ~~magis~~ ^{magis} præstantius (8).

His incrementis in Italiâ atque in Galliâ augebatur reli-
giosus ordo, cum Hispaniarum Rex Ferdinandus V., tam San-
cto instituto carere noluit, atque etiam Maximilianus I. Impe-
rator nos in Germaniam advocare sollicitus fuit (9). Ecquis
non mirabitur celerrimum hunc Ordinis nostri progressum, non
quidem amplificandæ Familiæ nostræ desiderio importunisq; sol-
licitationibus, sed propensissimæ in nos Regum civiumque volun-
tati, omnino tribuendum. Neque præ conceptam opinionem de-
fraudarunt recentius constitutæ apud Hispanos & Germanos Re-
ligiosa Colonia, ab antiquiori Italarum Gallorumque gloriâ mi-
nime degeneres. Et requidem ipsâ, si Ecclesiasticos Hispania-
rum fastos consulamus, tanto Sacrorum Antistitum numero
nullibi commendatur Ordo noster, neque plures sanctitate spe-
ctabiles & doctrinâ famâ celebres viros ullibi numerare & præ-
dicare potest. In ipso Societatis nostræ apud Hispanos exordio
unum mirari satis erit Illustrissimum Patrem Bernardum Bui-
lium Ferdinando Regi Catholico apprime carum, magnæ aucto-
ritatis

ritatis parisque doctrinae atque excellentioris Sanctitatis virum, qui Gerundensis Episcopus creatus, Ecclesiasticis rebus Sanctè & præclarè gestis Clarus fuit (10). Verùm multos inter qui Ordinem nostrum illustrarunt Sacros præsules, si parem, nullum certè Superiorem invenire est Gasparo de Fosso Rhegiensi in Italià Episcopo, qui in Concilio Tridentino Orationem habuit, Patrumque omnium atque Summorum Pontificum existimationem in se ità concitavit ut propositas sublimiores Ecclesiæ dignitates magno religiosoque animo recusaverit (11). Hac quidem per magna sunt, sed eo maxime nomine laudari debet Clarissimum illud Ordinis nostri lumen Rhegiensis Antistes, quod familiaritate epistolicoque commercio cum S. Carolo conjunctus fuerit.

Neque minus illustri laude, qua cum Gallià atque Hispanià communis est, decorata fuisse apud Germanos nostri Instituti primordia. Revocemus in memoriam vicissimè illa neque satis omnium lacrymis deploranda grassantis per Galliam, atque Germaniam sævissimæ hereseos tempora. Meminisse horret animus violatam templorum Sanctitatem, nefariè proculcatas flammisque dispersas Sanctorum nostrique B. Parentis reliquias; tandem subversis funditus domiciliis serè in cunis extinctam nascentem nostram Societatem (12). At in tantâ rerum nostrarum strage ac perturbatione, id nobis solatio sit strenuos habuisse Religionis Athletas quorum sudoribus & sanguine irrigata nostra Societatis incunabula, hoc veluti semine aucta latius exultarunt latiusque fuerunt amplificata (13). Iisdem temporibus per Hispanias longè latèque serpebat Maurorum Colluvies, non solum diruta religiosa hospitia, & pro Fidei defensione tormenta mortemque ipsam passi sunt religiosissimi hospites, sed etiam teterrimum exarserat bellum ità ut inclinare viderentur Christianorum res, Sacraque omnia ferro metere paratus esset ferocissimus hostis. At victoriam Ferdinando Regi pollicentur spondentque Sodales nostri: en subito mutata rerum facies, Mauri antea

anted victores fugantur, ad internecionem caduntur totoque Regno pelluntur; atque hac est gloriosissima sanè origo præclari nominis de Victoriâ, quo apud Hispanos exornatus fuit Ordo noster ad perpetuam vaticinii memoriam. O adoranda Divina & beneficentissima providentiæ consilia! eâ ipsâ tempestate quâ doctrinæ morumque Sanctitati acerrimum bellum indixere Ecclesiæ hostes, suscitavit D. O. M. religiosas Familias quæ laxiori disciplina austerum vitæ Institutum, omni flagitiorum generi virtutum omnium exempla opponerent, quæ tandem laboribus, periculis, morteque ipsâ fidei integritatem atque castitatem, defenderent (14).

Ea est insausa ingenii humani & naturæ propensio, ut sæpè numero Societates religiøsæ, quæ præclarissimis aliquando inclauerunt initiis a pristino postea splendore degeneres paulatim collapsæ, vergant in deterius. At longa dies inimica rebus etiam optimè constitutis, benè juvantibus superis, quantum ferre potest humana imbecillitas in longâ Ordinis nostri senectute, religiøsæ disciplinæ severitatem, bonam morum simplicitatem, virtutis doctrinæque studium non labefactavit aut imminuit; eâdem religionis integritate, eâdem doctrinarum laude, iisdem vitæ rationibus & Institutis ubique gentium floret Ordo noster. Ac primo quidem quod pietatem spectat, non sine magnâ veneratione in ipsis Instituti nostri primordiis appellari debent Paulus a Paterno, Mathæus Michael, Franciscus Binetus, Germanus Lionetus, Dionysius Barbierius, Jacobus Lespervierius, Ambrosius a Jesu, aliique sexcenti quorum nomina breviori hac oratione contineri vix possent (15). Neque defuerunt sequentibus deinde temporibus illustres Sanctitate viri, (16) Gaspar Bonus, Franciscus a Longobardis, Duanius, Moreavius, Hieronymus Detienneus, Paulus Trouchetus aliique plurimi eâdem virtutis laude commendandi (17). Quod dignitatum scientiarumque famam attinet; quamvis incertum semper

semper vixerit religiosissimus privata Solitariaque vita amor; intra parietes tamen delitescere non potuit splendidior multorum ex nostris gloria. Ex eo fuere numero viri Clarissimi atque Illustrissimi Praefules Didacus de Sylva, Clericus de la Fare, Dattichius, Dinetus, Antonius De Boulogne, Palanchus, Gaschius; ut silentio praeteream laudatos jam, neque satis laudandos Builium, & Gasparum de Fosso, aliosque Antistites bene multos qui ex Religiosi Claustris angustiis ad dignitatum fastigia erecti prodierunt, Ordinemque nostrum atque Ecclesiam rebus praeclare gestis exornarunt (18). Iusta Orationis limites longè excederem, si vel nominare vellem percelebres Scriptores qui non nosmetipsos duntaxat, sed Christianum Litterariumque orbem doctrinae eruditionisque lumine illustrarunt. Scrutemur Annales nostros, celebratissimos inueniemus Theologos sacrosque Oratores qui priorem quoque Ordinis nostri atatem commendant; recensere satis erit Simonem & Rolandum Guichardum, Joannem Thierry, Joannem Brunonem Scotum, Bonaventuram Hepburnum, Franciscum Lanovium, Rangolium. Longius esset appellare innumerales ferè recentiori aetate celeberrimos viros, qui Sacris concionibus Theologicisque operibus sibi nobisque gloriam conciliarunt immortalem (19). Neque satis aequum sese praeberet hominum aestimatorem qui ex praesenti sacrae eloquentiae statu de antiquioribus, quorum celebritas maxima fuit, Sacris Oratoribus iudicium facere, atque audacius pronuntiare non dubitaret. Inconcussa quidem veritatis est doctrina Evangelica, verbum Divinum nullis praescribitur temporibus; verum aetate praeterita, in nostrâ praesertim Galliâ, orationes Sacrae eo qui nunc invaluit politiori Sermonis cultu non vestiebantur; alia in usu erant vocabula quae nunc cecidere, alia erat dictionis forma. Quae cum ita sint, ad justam veterum Scriptorum aestimationem, praetermitti sanè non debet temporis ratio & usus penes quem loquendi


quendi jus est & norma . Quantum ergò debet esse nostrum gaudium in tanto rerumstrarum spectaculo ! Quanta debet esse Ordinis nostri gloria ad Deum tamen tota referenda ! dum inter nos intuemur ad hæc usque tempora satis multos doctrinâ & virtute insignes viros , apostolicis ministeriis & præclaris vitæ exemplis summo perè commudabiles ; Theologicâ doctrinâ , linguarum peritiâ apprime claros ; frequentissimos atque præstantissimos in variis facultatibus Scriptores , eximios quoque complures Pontificii ac Cæsarei juris consultos , quorum omnium nomen litterariam rempublicam adornat (20) . Verum quamvis in hoc multiplici doctrinæ genere satis sese commendet Ordo noster , silentio tamen minime præterire licet haud mediocrem sanè splendorem qui ex philosophicis mathematicisque disciplinis in nostram Societatem derivavit . Antiquiores quidem Annalium nostrorum tabulæ eximios in rebus Mathematicis & Philosophicis viros referunt ; at quis in historiâ litterariâ vel tantisper versatus ignorat magna sanè nomina . Mersenni , Maignani , Niceronii , Plumierii , Feuillei (21) ! qui non solum egregiis operibus æternam famam sibi compararunt , sed etiam discipulos , si non æqualis , non mediocris (22) certè doctrinæ heredes reliquerunt . Neque præclarissimo huic studiorum generi aliquid laudis decerpere poterunt censores , si qui sint , plus æquo religiosi qui philosophicas , mathematicas aliasque id genus disciplinas velut ab instituto religioso alienas fastidiosè traducunt , easque tanquam prophanas aspernari non dubitant . Imperitos illos doctrinæ iudices pluribus verbis refellere superfluum omnino est . Ecquis enim nescit eam esse harum scientiarum efficaciam ut intelligendi vim , maxime augere valeant & alterius cujuslibet tractandæ disciplinæ methodum & facilitatem conciliare . Id exemplo suo demonstrant Mersennus & Maignanus ex quorum operibus sanè egregiis judicare difficile est an excellentiores fuerint Mathematici & Philosophi , an præstantiores Theologi (23) . Ecquis non verebitur tantorum homi-

num laudes imminuere ? Cum apud litteratos homines non solum nominis celebritate, sed etiam apud principes viros Regesque nostros existimatione & gratiâ plurimum valuerint (24).

Utinam satis mihi esset vel facultatis ad dicendum vel temporis, ad celebrandam, pro dignitate, Ordinis nostri gloriam. Ego vero ex iis quæ hæcenus dixi satis videor ostendisse pristinum & longâ annorum serie confirmatum Societatis nostræ splendorem. Sed quid longinqua consuetamur ? Cum propiora præ oculis habeamus. Intueor in vobis, religiosissimi atque ornatissimi PP., velut superstites ac redivivos per celebres illos familia nostra viros qui hanc pietate & doctrinâ atate quâlibet decorarunt. Fecundissimum sanè mihi est neminem videre inter vos, qui ad supremam Ordinis nostri dignitatem evehctus, exemplo, consilio, auctoritate nostram hanc gloriam tueri, sustinere atque promovere non possit. Ordinis nostri summa certè laus est, quod magnorum virorum copia minimè desideretur, quod bene multi sint in hoc præclarissimo confessu, quorum amor, integritati, prudentia, fidei, familia nostra administratio & gloria deferatur atque committatur, ita ut ferè dubitari videatur quis potissimum nobis omnibus opportunior futurus sit, quis gloriosior. Verùm ut hæc dubitatio vestra omnisque animi suspensio, si quæ sit, in re gravissimi momenti depellatur atque omninò evanescat, circumspicite præsentem Ordinis nostri moderatorem sapientissimum qui nos paterno amore, suavissimâ lenitate & affabilitate, magis quam imperio & auctoritate gubernavit, qui religiose disciplina vigilantissimum observatorem prudentissimumque defensorem sese prebuit, qui existimationem apud optimates & principes, religionis exemplo, ingenii vi, cultiorique doctrina sibi comparavit. Loquatur nostra Campaniæ provincia quæ quidquid boni habet suo amantissimo parenti id totum fatetur referere acceptum. Loquatur unâ voce totus Ordo quem terrâ marique, non sine salutis discrimine, indefesso labore & inaudita propemodum


dum sollicitudine perlustravit . Loquatur & tandem Roma ipsa ubi amplissima instituti nostri munia sic gessit , ut non solum dilectissimi Patris loco a nostris haberetur , sed etiam Principibus , viris summisque Pontificibus apprime carus fuerit . Testis est Roma quanto omnium Ordinum applausu , dum Ordinis nostri negotia procurabat , audita atque excepta fuerint Orationes sacrae quas coram Summo Pontifice amplissimoque Cardinalium Senatu habuit , quarum etiam nunc extat honorificentissima memoria , frequensque mentio . Testis tandem est Roma quanta sapientiae laude , dum res nostras supremam auctoritatem administrabat , apud omnes floruerit , ita ut difficiliora quaque negotia felici exitu miraeque facilitate contigerint . Vobis autem . C. PP. nobisque summopere gratulor quod in Successore deligendo , tale exemplar vobis proponere nobisque restituere possitis , ita ut parens optimus non ereptus sed redditus videatur . Quae cum ita sint , nihil jam reliqui esse nisi ut D. O. M. pro tantam Ordinis nostri felicitate & gloriam agamus gratias , divinamque imploremus clementiam ut nostram familiam foveat , in pristino hodiernoque splendore conservet , omnem disciplina laxitatem omnisque corruptela fomitem desidiam longius avertat ; ac tandem gratiae suae auxilio non fugitivam duntaxat brevioris , sed immortalem nobis prepararet decernatque gloriam .





ADNOTATIONES

ORDINIS NOSTRI, VIRORUMQUE ILLUSTRUM HISTORIÆ INSERVIENTES

- (1)  *Æ*C familiæ nostræ insignia esse voluit B. Patens; nempe *Caritatis nomen aureis litteris in areâ caruleâ insculptum*. Divinum quidem est caritatis præceptum; sed nobilissimum illud religiosæ gentis nostræ stemma, Sancto Fundatori ad cælestium rerum contemplationem evecto, ab angelo demonstratum fuisse & è cælo veluti delapsum referunt antiquissimi historiæ nostræ Scriptores. Quare duplici nomine, divina appellari possunt præclarissima hæc nostræ Societatis insignia.

(2) Ad tollendam de Ordinis nostri ætate ambiguitatem omnem, varia distingui debent nostri Instituti initia. Primum initium repeti potest ab eo tempore quò S. Franciscus de Paulâ fratres cepit congregare & cœnobium ædificare; quod quidem anno 1435 contigisse certum est. Etenim S. Franciscus cum vix decimum quartum annum attigerat, in

in solitudinem secessit ; post quatuor aut quinque annos fratres in Societatem admisit, eos simili quam gerebat veste induit, docens Sanctè vivere & vitam *quadragessimalem* observare. Quare cum S. Franciscus natus sit anno æræ Christianæ 1416, in solitudinem se contulit anno 1430, fratresque anno ætatis suæ 19. in cœtum recepit, ac proinde anno 1435. En provectiorem Ordinis nostri senectutem.

His quidem exiguis initiis crevit familia nostra ad annum usque 1471, quo *Pyrrus* Episcopus *consentinus* litteris datis die ultimâ Novembris Ordinem nostrum in suâ *Dia-cesi* confirmavit. Sed anno 1473 atque iterum 1474 in universa Ecclesia familiam nostram suprema auctoritate approbavit Summus Pontifex Sixtus IV. Tandem regulas a S. Patre constitutas & nonnihil mutatas confirmarunt posteriores Romani Pontifices *Alexander VI.* & *Julius II.* ann. 1493. 1505. Quæ cum ita sint, facili negotio componi poterunt quæ a nonnullis rerum nostrarum Scriptoribus diversissimè tradita sunt de Ordinis nostri antiquitate, pro varia scilicet religiosæ Institutionis acceptione. Et quidem, si Institutionis nomine intelligamus primum illud initium quo S. Pater domum ædificare fratresque congregare cæpit, demonstratum omninò est Ordinis nostri initium ab anno 1435. sumendum esse. Neque obstat quod nulla hoc anno facta legatur Ordinis nostri approbatio; argumentis enim *negativis* longè anteponenda esse *positiva* testimonia præscribit accuratoris criticæ & conscribendæ historiæ ratio. Præterea testatur *Vghellus* in Italia Sacra duos extitisse S. Francisci temporibus *Consentinus* Episcopos ex nobili *Caracciolorum* gente progenitos, quorum primus fuit *Berardus*, vel ut alii malunt, *Berardinus*, alter autem *Pyrrus*. Porro fidem faciunt antiquiora Ordinis nostri monumenta utrumque in res nostras fuisse propensissimum. Quare fieri potuit ut *Berardus*, qui suo patrocinio

na-

nascentem Societatem fovebat, primum Ordinis nostri domicilium, verbo atque ore tenus approbaverit.

(3) Litterarum studia præscribit S. Pater *Reg. cap. 9.* itemque *Corrēt. cap. 9.* illudque maximè commendat doctrinæ genus quod *ad prædicandum & confessiones audiendas est idoneum*, ita ut violatæ regulæ omninò rei sint, qui pro viribus præceptum illud implere negligunt; etiamsi religiosis vacent exercitiis; multò minùs autem excusandi si otiosam agant vitam. Hic autem, datâ occasione, perstringendus est *Bailletus* qui in vitâ S. Francisci de Paulâ falsò dictitavit, contemplationis otium duntaxat a Sancto Fundatore nobis fuisse demandatum, primosque instituti nostri viros obscurè atque illiteratos vixisse. A nostri instituti legibus longè alienum fuisse *Bailletum* non solum ex regulæ nostræ statutis manifestum est, sed etiam ex propensissimâ voluntate qua litteratos viros excepit S. Parens & in suum Ordinem cooptavit; duos appellare satis erit quorum primus est Pater *Laurentius Clavensis* quem S. Franciscus laudat tanquam virum doctum *a quo omnis hauriri possit consolatio tam spiritalis quam temporalis*: ut legitur epist. 83. in litterarum *centuriâ* quam collegit *P. a Longobardis*.

Alterum nascentis nostræ Societatis litteratum hominem maximè venerabatur S. Institutor, nempe Patrem *Balthazarum de Spino* qui fuit primus Ordinis nostri Sacerdos & veluti alter parens, ut ait *Lanovius*. Hunc fuisse utriusque juris Doctorem & *Innocentii VIII.* Summi Pontificis *a confessionibus* fatetur ipsemet *Bailletus*; atque idem Summus Pontifex in *Bullâ* qua ann. 1488. Ordinem nostrum exornavit, *Balthazarum de Spino* vocat *familiarem & amicum nostrum*. Hæc Bulla in Ordinis Bullario prætermissa, in conventus Paulani tabulariis religiosè asservatur. Romam a S. Patre missum fuisse Patrem *Balthazarum* ad gerenda Ordinis

dinis negotia , primumque Procuratorem generalem extitisse testantur antiquiora & indubitata annalium nostrorum documenta . Hanc adnotationem nullo possumus honorificentiori concludere testimonio quam verbis Summi Pontificis Clem. VIII. *Consl.* quæ incipit *Injuncti nobis* . Dat. 15. Jun. an. 1603. *volentes igitur universum Ordinem Fratrum Minorum S. Francisci de Paulâ , ex quo uberrimi in eâdem Dei Ecclesiâ fructus , ad ipsius omnipotentis Dei laudem & Christianæ Reipublicæ spirituale commodum & utilitatem , ab ipsius Ordinis initio semper prodierunt , & in dies prodeunt &c.* Iisdem omninò elogiis Ordinem nostrum commendavit Urban. VIII. in *consl.* dat. an. 1624. die 28. Jun.

(4) Hic in universum duntaxat laudantur strenui familiæ nostræ heroes qui laboribus evangelicis ipsoque Sanguine Sanctam Religionem propugnarunt ; horum autem nomina suis locis deindè appellabimus .

(5) *Ludovicus XI.* Galliarum Rex *Ferdinandum* Neapolis Regem non solum litteris sollicitavit ut Franciscus in Gallias mitteretur , sed etiam Summi Pontificis *Sixti IV.* auctoritate interposita . Extant Sixti IV. litteræ ad Ludov. XI. & ad S. Franciscum datæ apud *Odoricum Raynaldum* qui eas ex libro *Brevium* descripsit . Has autem legere jucundissimum erit iis quibus res nostræ cordi sunt , ut esse debent .

(6) Honores S. Viro , ubi Neapolim accessit a Rege ipso omniumque Ordinum civibus delatos describit *Comineus* . Tantam fuisse civium turmatim confluentium multitudinem , referunt testes *processus Calabrics* , ut turbæ impetum accita militum manu , reprimere necessum fuerit . Quanto autem omnium applausu Romæ exceptus fuerit Franciscus testatur idem *Comineus* , eum invisere non dedignati sunt quotquot in Urbe extiterunt *Cardinales* : Summus Pontifex eum ad familiare colloquium ter adnuit . *Comineus* refert

fert S. Virum ubi ad Regem venit, tantâ veneratione acceptum fuisse ut Rex ipse majestatis oblitus ad genua se prosternere non dubitaverit, B. Patris precibus sese commendans diuturnioremque postulans & sperans vitam. At non vitam longiorem, sed meliorem expectandam Regi significavit Franciscus, ipsumque mortis diem indixit. Hinc factum est ut Ludovicus abjectiorem nec satis religiosum mortis metum, in Christianam spem magnamque animi constantiam commutaverit, & sibi atque regno sapientissimè providerit; ita ut in universâ Regis aulâ sanctiorem religionis cultum a S. Francisco restitutum fuisse scripserit D. Duclos in historia Ludovici XI.

(7) Recensebimus atque laudabimus suo loco benè multos familiæ nostræ illustres viros, qui dignitates ultrò oblatas propositaque vitæ commoda recusarunt, qui inviti atque repugnantes amplissimis honoribus sese subjecerunt. De nostris hominibus hæc scripsit Bailletus: *Jamais on ne les a surpris dans les intrigues des affaires du dehors; jamais on ne s'est appercû qu'ils aient aspiré aux dignités, ou aux emplois ecclesiastiques*: quo quidem animo hæc dixerit Bailletus qui de Ordine nostro demissiùs sentiebat, an seriò an jocosè, ex ejus verbis conjicere vix possumus. Sed quidquid sit, nos laudis maximæ loco habemus Christianam fundatoris nostri humilitatem imitari, eamque libenter profitemur sapientiam quæ superbis fastuosisque hominibus videtur insipientia.

(8) *Boni hominis* nomen apud omnes bonos honestosque homines venerandum Francisco tribuit Auctor anonymus vitæ ejusdem Francisci, sanctique Fundatoris socius: *Et primo recitabimus de bonâ vitâ boni hominis*: Quæ verba sic gallicè reddit interpret ejusdem ferè ætatis: *Et premièrement, reciterons de la bonne vie du bon homme Francois de*

C

Paule.

Paule. Hoc nomen ob vitæ sanctitatem morumque simplicitatem a Ludovico Rege aulicisque omnibus S. Viro attributum fuisse refert *Comineus*; atque eandem præsertim ob causam in Ordinem nostrum apud Gallos eadem appellatio derivavit.

(9) Ad Carolum VIII. Ludovici XI. filium Regnique hæredem transmissa est summa ergà S. Patrem veneratio, & eadem quoque in nostram familiam propensio. Iisdem temporibus apud Galliæ Regem orator a *Ferdinando* hujus nominis V. missus fuit *Petrus de Lucentia Olbia*, cui comes adjunctus fuerat *Ferdinandus Pandurus* nobilis Hispanus, prædictoque Oratori genere proximus. Ambo S. Fundatoris familiaritatem pari desiderio expetebant; Sed *Ferdinandus Pandurus* Institutum nostrum amplexus est; & *Petrus de Lucentiâ* quotidianis Francisci miraculis vitæque sanctimonia magis ac magis excitatus, traducendis in Hispaniam S. Viri discipulis atque constituendis omnem suam operam & liberalitatem pollicitus est. Quo anno a B. Fundatore hæc missio in Hispaniam facta fuerit certò non constat; aliqui ad annum 1487., alii verò ad annum 1492. eam referunt. *Lanovius* utramque opinionem hac ratione componit, quod nempe anno 1487. obsessa *Malaca*, atque ancipiti Marte concertantibus Christianis & Mauris, a S. Francisco in Hispaniam transmissi fuerint duo nostri Ordinis Patres, nempe *Bernardinus a Cropulatu*, & *Damianus Lespervierius*, qui certum de victoria nuntium Ferdinando Regi sponderent, pellendosque tota Hispania Mauros prædicerent. Nec verbis defuit eventus, obtentâ feliciter victoriâ & Mauris partim fugâ dilapsis, partim in Ferdinandi Regis manus & fidem ultrò se deditibus. Hæc autem mirabilis bellicarum rerum conversio nomen a *victoriâ* Ordini nostro reliquit, tantamque gratiam apud Ferdinandum conciliavit ut constru-

struendi apud *Malacam* cœnobii fidem dederit ; quod quidē, in tanto rerum tumultu, executioni mandari difficile fuit ; donec anno 1492. composito bello, receptâ *Granatâ* extinctisque Mauris, duobus prælaudatis Patribus sese socios adjungere potuerint alii plurimi, inter quos extirere magni nominis, majorisque Sanctitatis viri opportuniùs deinde recensendi.

Quod spectat Ordinis nostri missionem in Germaniam, hanc anno 1497. consignat *Lanovius* ; ipse tamen fatetur jam antè annum 1490. aliquos ex nostris in Germaniam transivisse ; idque colligit ex antiquo foundationis Filstricensis instrumento in quo hujus cœnobii Patres *Eremitarum* nomen retinent ; quod quidem argumento est conventum hunc antiquiorem esse anno 1490., nempe ante inditum Ordini nostro ab Alexandro VI. *Minimorum* nomen. Paucos antè annos ad manus meas pervenerunt aliqua de Ordinis nostri apud Germanos propagatione documenta, quibus testatum video antiquiorem esse in Germaniâ familiæ nostræ institutionem. Et quidē in Wittingaviensi *archivo* extant variæ litteræ in quibus cœnobii *S. Andreae in Ruckelrveis* fundatio tribuitur nobilissimæ *Rosembergiorum* genti, atque inter litteras illas leguntur nonnullæ quibus *Henricus de Rosemberg* anno 1474. fidelem quemdam hujus cœnobii villicum constituit ; quæ quidem litteræ, si certæ fidei sint, evincunt omnino Ordinis nostri in Germania majorem esse quam in Hispaniâ antiquitatem. Sed quidquid sit, certum est ab ipsomet S. Fundatore in Germaniam missos fuisse Religiosissimos Patres *Dyonisium Barbierium* & *Franciscum Cerdonium*, qui ob eximiam pietatem augustissimo Imperatori Maximiliano I., plurimisque proceribus & dynastis acceptissimi, intra breve tempus tria cœnobio receperunt, eaque optimis di-

disciplinis & religiosis vitæ commodis instruenda esse curarunt .

(10) *Bernardus Buil* Hispanus apud Ludovicum XI. Ferdinandi V. Hispaniarum Regis orator missus est ; quo tempore cum S. Virum familiariter tractaverit , ex *Benedictino* Ordine quem professus fuerat ad nostrum transivit . Hinc facili negotio conciliantur quæ de nostro Bernardo variè scripta sunt . *Possëvinus in apparatu sacro* , *Bernardum Benedictinum* vocat . *Constantinus abbas Cajetanus* duos *Bernardos Builios* facere non dubitavit ; unum Ordini *Benedictino* ascribit , alterum Ordini nostro restituit . Indiarum quæ *Occidentales* dicuntur *Patriarcha* fuit *Bernardus Builius* atque deindè *Gerundensis* Antistes . Indiarum *Patriarcham* fuisse *Bernardum Benedictinum* asserit laudatus abbas *Cajetanus* , neutrum verò *Gerundensem Episcopum* extitisse affirmat ; sed alium *Builium* multò recentiorum nomine *Guillelmum* inducit . Errorem de duplici Bernardo ex temporum confusione ortum , longiùs refellere minimè necessum est . Porro argumentis ex *Chronologiâ* & accuratiori temporum ratione desumptis ostendit *Morales in Chron. Boetica* non alium quam *Bernardum* nostrum , tempore quo *Minimus* non *Benedictinus* erat apud *Occidentales Indias* *Patriarcham* fuisse . Quod verò idem *Bernardus* noster *Gerundensis Episcopus* fuerit testatur *Trimarchius* , qui in ipso *Gerundensi* templo propriis oculis usurpavit verba *Bernardi Builii* sepulchro inscripta quibus *Ordinis nostri professor* legitur . *Builium* legati in Galliam nomine ac potestate functum fuisse ut oppigneratos *Russilionis* & *Cerdonia* comitatus redimeret , tradunt Hispanorum annales ; magnum scilicèt momentum in S. Francisci apud Regem existimatione & fide positum videbatur . Et quidèm eo auctore restitutos fuisse comitatus prædictos Hispani glo-

gloriantur, quasi ex Sancti Viri auctoritate certius illis jus quaesitum videri possit.

(11) *Illustrissimus vir Gaspar Ricciulus de Fosso* qui a Francisco Bineo Sancti Patris successore ad nostrum Institutum admissus, deinde Ordinis nostri Moderator Generalis fuit. Ab Ughello in Iraliâ sacrâ vir doctissimus appellatur. *Scalensem* Ecclesiam primùm gubernavit, deinde *Calvensem*, tandem ad *Rhegiensem Archiepiscopatum* translatus. Interfuit Concilio Tridentino in quo præclaram de eo conceptam spem eximiè sustinuit atque etiam superavit. Illius adventus Legatis Summi Pontificis ità exoptatus expectatusque fuit, ut eo absente nihil agi voluerint; ubi autem venit, doctrinæ Theologicæ plenam orationem habuit: *de Auctoritate Ecclesiæ in rebus fidei definiendis*: Hujus Orationis argumentum leviter perstrinxit Concilii Tridentini perniciosissimus Scriptor *Soavius*; sed integra Oratio typis mandata est. *A Gregorio XIII.* ad Sacram *Purpuram* non obscurè designatus, importunis tandem precibus obtinuit ut ab urbe discederet tantumque honorem declinaret, demirantibus omnibus qui Summi Pontificis propensissimam voluntatem & modestissimi viri repugnantiam probè noverant. Neque hîc præterire licet quod publicam quâ apud omnes Ricciulus noster florebat venerationem demonstrare maximè valet. Ab anno 1555. cum post mortem *Marcelli II.* paucorum dierum Pontificis pro deligendo successore comitia instaurata essent quibus electus est *Joanne Petrus Carassa* dictus *Paulus IV.* noster Gaspar de Fosso tunc *Calvensis Episcopus* multis *Cardinalium* votis atque suffragiis ad supremam Ecclesiæ dignitatem postulatus est & fere electus. Obiit in sua *Diœcesi Rhegensi* omnium desideriiis, pauperumque lacrymis magis quam dignitate ulla exornatus: exequias celebravit funebremque laudationem habuit Rm̃us

D. Joan-

D. Joannes Camarota Episcopus Bobiensis qui in Orationis argumentum hæc Apostoli verba adhibuerat *oportet Episcopum irreprehensibilem esse*, eaque ad Gaspari nostri laudes, pro merito traduxit. Sed aliâ qualibet laude superiores sunt datæ ad Gasparum nostrum *S. Caroli* litteræ ex quibus liquet quantâ existimatione apud *Pium IV.* ejusque Nepotem *S. Carolum* Archiepiscopus Rhegiensis valuerit. Hæ litteræ leguntur in historiâ generali Ordinis Minimorum quam edidit Noster *Donus Dattichius*, inter illustriores familiæ nostræ Viros atque Episcopos deindè recensendus.

(12) Perduellium hæreticorum furore vexatus fuit nascens in Germania Ordo noster. *Fisstricensi* cœnobio expulsi Patres quorum multos in pago non procul distante *Münchschlacht* trucidatos fuisse refert rerumstrarum peritissimus Pater *Aram*, qui pagum hunc nominis sui etymologiam traxisse scribit ab illa nostrorum Heroum cæde. Provinciæ Germaniæ haud mediocre ornamentum adjungit quod testatus est *Rm̃us P. Martialis de Vicinis*; hic anno 1526., ut suo fungeretur Moderatoris generalis officio, ad perlustrandas Ordinis Provincias laboriosum iter aggressus est, difficilique & periculosa peregrinatione Boemiam & Austriam superavit. Extabant in Germaniâ tres tantum conventus, B. Patre adhuc superstite instituti, quos vix ob Lutheranorum factiones, retinere poterant religiosi hospites. Abducti a Lutheranis plerique desiderabantur, reliquos ad animi fortitudinem atque constantiam hortatus est *P. de vicinis*. Sed paulò post immanis in nos factus est hæreticorum impetus; ejusdem Provinciæ rector qui *Neapolim* aufugit nostrisque rem totam exposuit, hanc apud nos traditionem reliquit centum ex nostris religiosissimos Patres, ferro aut alio suppliciorum genere vitam amisisse. Sed quidquid sit de tanta religiosorum Athletatum strage; quot & quanta pro
fidei

fidei defensione in Germania exantlaverint nostri homines non solum testatur Illūsus Episcopus *Averranus* in sua Germania Sacra, sed etiam fidem faciunt diplomata plurima in *Pragensi Archivio* asservata quorum apographa in meis servantur scriniis. Cæterum *P. Martialis de Vicinis* Gallus quidem natione fuit, sed inter Hispanos ab ipsis Missionis nostræ initiis versatus est; referunt enim Annales nostri *Bernardum Builium*, *Ferdinadum Pandurum*, *Germanum Lionetum*, *Joannem Abundantium* percelebres nostræ familiæ viros per Urbem *Toletum* transivisse, ibique in majori templo *Martialem* nostrum coram prædictis PP., universo Clero, & frequentissimo Ordinum omnium consensu, religiosæ militiæ nostræ Sacramentum dixisse.

Neque feliciter in Gallia cesserunt res nostræ; pro hæreticorum rabie nullo ferè loco consistere tutò poterant homines nostri. Sepulchrum B. Fundatoris venerandum illud sacrumque pignus, quàm barbarè violaverint hæretici meminisse horret, sanctum corpus effossum & Fune alligatum impiâ manu protrahunt, magna lignorum strue ex votivis tabellis sacrisque ornamentis collectâ, flammis imponunt & in cineres redigunt. Nec minùs inhumanos ergà S. Parentis filios sese præbuerunt sævissimi illi Religionis hostes. *P. Eustachius Aprilis*, qui Provinciam *Turonensem* secundùm rekerat, pro religionis causâ è sublimi scalâ dejectus, capite pedibusque contusus, post paucas horas Deo gratias agens sanctè expiravit. Hujus gloriosæ mortis fidem faciunt provinciæ *Turonensis* documenta. Pro eadem causâ, diu vexatus est in Aquitania Sclopetorumque ictibus confossus *P. Nicolaus Ficquetus*, provinciæ *Franciae*, ut vocant alumnus, ad oomitia generalia delegatus seu commissus. Meminere hujus mortis non solum *Triflanus*, *Montoya*, sed etiam antiquissimæ in nostris primariis conventibus tabellæ

Nico-

Nicolaum nostrum palma Martyrii decoratum exhibent.

Galliæ nostræ vindicari etiam debet strenuus fidei defensor *Thomas Felton* ex nobilissima apud Anglos stirpe, sed longè nobilior ob gloriosissimam mortem Patris sui *Joannis Feltonii*, qui pro defendendo summi Pontificis primatu in Anglia capite truncatus est. *Thomas Feltonius* illius filius patriis bonis destitutus, galliam profectus in *Rhemenſi* collegio studiis operam dedit, ac deindè institutum nostrum amplexus est. *Londinum* postea cum perrexerit graves ob causas, de sua stirpe & fide interrogatus, se *Joannis Feltonii* filium, virum catholicum atque Religiosum esse magno animo confessus est, atque ad patris exemplum pro fide catholica mori paratissimum se esse respondit; quibus auditis, conjectus in carcerem patibulo affixus est, ann. 1588. die 28. Augusti. Huic diei mortem *Thoma Feltonii* Martyrologium Anglicum consignat his verbis: anno 1588. *Regina Elisabetha* anno 30. *Thomas Felton* religiosus *Ordinis Minorum*, martyrium passus est die 28. Augusti. De eadem morte hæc habet Chronologia *Joannis Stous*: *Thomas Felton*, & *Joannes Clarkson* patibulo fuere affixi propter deffensionem *Ecclesia Romana*: Eiusdem martyrii meminit *Sanderus* in historia Schismatis Anglici.

Iustos adnotationum limites longè excederem, si omnia nostrorum hominum pro Catholica Fide certamina vellem describere; legere est in nostris Annalibus barbaras Hæreticorum irruptiones in varios conventus nostros, *Bracacuriensem*, *Gratianopolitanum*, *Castelnaudensem*, *Gabanensem* aliosque multos incendiis vel direptione vastatos, è quibus pulsi fugatique religiosi incolæ, nonnullis etiam morti crudelissimè traditis. Non Hæreticorum duntaxat sed infidelium quoque furorem experti sunt homines nostri. *PP. Arnoldus ab Hydrunto*, & *Archangelus a Messanâ* a Pyratibus comprehensi; cum

cum nullis pollicitationum illecebris, nulla tormentorum vi expugnari potuerint ut Christianam Fidem ejurarent, capite obtruncato in mare præcipitati sunt; de quo quidem mortis genere renuntiatum est ab iis qui viderant & truculentas infidelium manus effugerant. Ejusdem supplicii mentio habetur in actis conventus Generalis Gratianopolitani ann. 1529. Eandem gloriosissimam mortem passi sunt PP. *Petrus Cuellar*, & *Joannes Vogel* in *Granatensi* Regno a Mauris pro Christiana Fide barbarè trucidati. Sed ut alios omittam plurimos, sine speciali memoria prætereundus non est *Guillelmus Serreux* Gallus, qui ad Baleares insulas transitum faciens in *Algerianorum* Piratarum manus incidit, & in durissimum mancipium redactus. Is cum forte occurrisset vacillantis Fidei Catholico viro, & ad Fidem Christianam per summum dedecus ejurandam in forum adducto, in medium prosilire non dubitavit *P. Serreux*, & quibus potuit verbis miserum hominem ad sanam mentem revocare conatus est; quod ut intrepidè aggressus, ità tandem feliciter obtinuit. Sed versa in *Serreuxium* populi & magistratus rabie, statim ipse ad supplicium raptus est & palo sine mora transfixus.

(13) Innumerabiles omninò sunt illustres familiæ nostræ homines, qui contrà hæreticos sacræ eloquentiæ armis strenuè pugnarunt, eamque ob causam non solum hæreticorum invidiam, sed odium implacabile in se concitarunt; paucos ex multis feligere satis erit. Adversus Hæreticos tanta eloquentiæ & Theologicæ ratiocinationis vi in provincia *Lugdunensi* insurrexit *P. Joannes Ropitel* tantamque nominis celebritatem consecutus fuerat, ut *flagellum hæreticorum* vulgò audiret. Impiissimos pseudo evangelii ministros ità acriter impugnavit debellavitque, ut eum de medio tollere cogitaverint Calviniani; illiusque vitam per insidias &

D

cuni-

cuniculos sæpè tentaverint ; atque tandem nefarium consilium apèrtâ manu ad finem perduxissent , nisi Lugdunenses cives qui sibi , Patriæ Religionique generosum Athletam incolumem servare erant solliciti , eum ad fugam quasi compulissent . *Joannem Ropitellum* meritis elogiis commendat *Rubifus* in historiâ *Lugdunensi* .

In laboribus evangelicis socium adjungemus *P. Joannem Dehem* , qui *Parisiis* non solum è suggestu hæresim fortitèr aggressus est , sed etiam in colloquio *Poissiaci* suæ doctrinæ illustria præbuit argumenta . De illius sacris concionibus magnificè scribit *Pasquierius* Senatus Parisiensis causidicus ; cum veluti facundissimum oratorem , & in theologicis controversiis exercitatissimum impensè laudavit . Nemo acriùs hæreticos oppugnavit , atque unus fuit cui alternas concionandi vices cum cardinali *a Lotharingiâ* sustinere licuerit . Non solum hæreticorum insidiis lacefsitus est , sed etiam catholicorum invidiâ ad Reginam *Catharinam Mediceam* ductus fuit , atque accusatus tanquam violatæ , quod nefas est , in suis concionibus erga Regiam Majestatem reverentiæ reus . At *Parisienses* cives *Dehemium* velut Urbis patronum fideique defensorum supplicibus votis repetebant . Vox populi & patefacta religiosissimi oratoris innocentia , calumniæ tenebras dispulerunt . *Parisiis* redux *Dehemius* summo omnium civium obviam confluentium applausu exceptus est . Tandem cum anno 1562. Urbem *Parisiis* infestaret contagio depopularerque , ad foeminæ cujusdam hoc favissimo morbo extremoque periculo laborantis confefsionem audiendam vocatus *P. Dehem* , huic caritatis officio sese alacrem promptumque præbuit ; sed pestilentiâ captus post paucos dies sanctissimè obiit , illiusque funus frequentissimo omnium Ordinum concursu , adstantiumque lacrymis & desideriiis magis quam ullius monumenti fastu gloriosum fuit .

Nullis

Nullis certè verbis laudari satis potest Franciscus Humblot, Ordinis nostri splendidissimum lumen. Per universam ferè Galliam suis concionibus theologicisque disputationibus Hæreticos infectatus est. Plures Calvinianæ sectæ ministros ad silentium adegit, aliquos ad Ecclesiæ gremium reduxit; *Cassagrinum* erroris Calviniani antesignanum, non in privati colloquii latebris & solitudine, sed in ipsâ Civium luce, publicâ dimicatione institutâ profligavit; *Brosselium*, *Chamierum*, *Caillam* & *Villanovanum* insolescentes Calviniani gregis ductores fregit atque prostravit; hæreticos plures devictos fatentesque habuit & Catholicæ Fidei restituit. Hinc factum est ut *Clemens VIII.* Summus Pontifex inter octo concionatores ad debellandam per Gallias hæresim Apostolicâ auctoritate delectos, Humblotum ut potè factioni hæreticæ terribilem præ cæteris destinaverit. Tam frequenti populorum concursu audiebatur ut majus templum Parisiense vix capere posset affusam hominum multitudinem. Sed heu! quam nihil est in humanis rebus firmum ac stabile! Humblotus noster quem avidè expetebant omnes, nefariâ arte ereptus est. Cum suggestum ascenderet convertendisque hæreticis operam daret, porrecta illi charta, sed veneno præsentissimo illita, quam ubi explicuit, pestiferum tabum totis naribus hausit; nec mora, cerebrum & præcordia invasit lentoque morbo in conventu Turonensi obiit an. 1612. Eximium hunc Fidei præconem hic paucis laudasse satis sit; at in his adnotationibus alias clarissimi hujus viri laudes suo loco persequemur. Adjungam duntaxat Humblotum nostrum acceptissimum fuisse *Henrico IV.* optimo Principi qui eum concionantem audit; apud Reginam *Mariam Medicæam* in maxima exultatione is quoque fuit; atque tandem Regina *Margarita* de vario scientiarum genere frequentissima cum eo familiaritèr habuit

colloquia; sed quæ primaria & solida laus est, oblatas sublimiores Ecclesiæ dignitates constantissimè recusavit; modestum verèque religiosum virum hortatus est Cardinalis *Offatus* a quo laudari elogium est maximum, ut se Episcopum eligi pateretur; sed religiosis effugiis huic amplissimæ dignitati sese subduxit. Falsò tamen scribit *Dattichius* magnum hunc Cardinalem Episcopatu *Montepessulano* sese abdicare voluisse huncque honorem *Humbloto* proposuisse. Verum quidem est Cardinalem *Offatum* non minùs pietate quam rerum gerendarum dexteritate insignem, nihil præternisisse ut *Redonensi* Episcopatu renuntiaret; at cum *Montispeffuli* Episcopum fuisse nullibi legitur. De *Humbloto* præclaram mentionem faciunt *Gualterius* S. I. Theologus in *Tabulâ Chronographicâ*. *Valladerius* in *partitionibus oratoriis* lib. 2. aliique Scriptores plurimi quibus adjungi debet testimonium canonici cujusdam *Virodunensis* qui *Humbloto* nostro populari suo amicissimus fuit, & se propriis oculis usurpasse testatus est litteras plurimas quas ad *Humblotum* dedit Regina *Margarita*, suam ergà religiosum doctumque virum existimationem significans eique primaria proponens Ecclesiæ munia, humanissimis quidem urgentibusque verbis. Eandem ferè vitam communemque mortem cum *Humbloto* habuit *Rolandus Guichardus*; at elegantius laudari non potest *Guichardus* noster quam verbis *Teophili Raynaudi* S. I. Theologi qui in *indiculo SS. Lugdunensium* præclarissimo elogio *Guichardum* exornavit; pauca describere satis erit: *Quanta fecerit tuleritque ad Catholica Fidei summis illis turbidissimisque temporibus, propugnationem, operosum foret in hujus breviculi angustias cogere. Quadragies insuperque septies verni jejunii conciones habuit, tempore Catholicis præconibus admodum aspero, cum omnia Calvinianis factionibus per-*

perstreperent . Nam non modo propinatum semel ac iterum ab illis utriusque majestatis perduellibus venenum hausit , cujus tametsi antidotis retusam vim , reliquâ tamen vitâ infestam sensit ; sed etiam in occitanie oppidulo captus , & in ferreâ crate subiectis ignibus torrendus , cum jam esset in ferale stratum reclinatus , suborto repente inter crudelitatis administros dissidio , præsentissimo exitio divinitus subductus est . Binas insulas nec cogitanti delatas religiosi status demissioni postposuit . Supremam diem obiit Lugduni an. 1612 .

Humbloto & Guichardo præxerat iisque superstes fuit Joannes Franciscus de Binans nobili apud anglos familiâ natus . Is cum Fidem Catholicam liberè & apertè profiteri non posset , in Galliam quindecennis profugit , patriæ , parentibus amicisque , religionis causâ , valedicens Institutum nostrum amplexus est . Nemini certè doctrinâ secundus fuit ; antè annum decimum quintum apud suos cultiorem philosophiam jam arripuerat , Theologiam *Parisiis* apud nos funditus didicit , linguarum Græcæ , Hebraicæ , & Latinæ peritiâ excelluit , res controversas omnes ita tenuit ut momenta omnia ad refellendos hæreticos prompta & in numero haberet . Hinc mirum non est quod his instructus præsidiis , adhuc juvenis magno applausu ad populum verbâ facere cæperit , *Cassagrinum* , *Calliam* aliosque Calvinianæ Sectæ gregales intrepidè feliciterque laceggerit . Theologiam positivam , omnibus mirantibus , novâ methodo tradidit , universam Scripturam doctissimis commentariis illustravit ; tandem contra Judæos hebraicâ linguâ disputavit , eosque proprio , ut ajunt , gladio jugulavit . Cum *Genebrardo Aquensi* Archiepiscopo doctissimoque viro de Scripturæ Sacræ difficilioribus locis & de hæbreo textu frequentes sermones habebat , nec sine magnâ peritissimi Interpretis *Genebrardi* admiratione . Obiit *Massilia* ; magnificum funus curarunt honoris

noris causâ Monachi quos *S. Victoris* appellabant, tanto autem populi concursu ut nonnisi per noctem multitudo dissolvi potuerit. Illustre tanti viri exemplum aliquos ex anglia ad nostrum Institutum pertraxit, quos inter appellare satis erit *PP. Andream Foletum*, & *Henricum Morum*. Pietate & doctrina commendabilis fuit *Foletus* atque pro fidei defensione per tres annos regnante *Elisabethâ* in turri Londinensi detentus est: *Morus* autem illustrioris nominis vir *Thome Mori* anglia magni *Cancellarii* & Martyris pro nepos, gentis suæ a Catholicâ Fide defectionem jugibus lacrymis deplorans, morum innocentia & sanctæ Regulæ observantiâ clarus, juvenis adhuc sed cœlo jam maturus beato fine consummatus est.

In ampliorem historiam excreveret opusculum illud, si recensere vellem singula a nostris contrâ recentiores hæreticos præclare & magnanimè gesta. O fortunatas Italiae Hispaniaque regiones quæ hæc carent gloria; Calvinianæ enim Lutheranæque hæreseon monstra nescierunt; suos tamen & quidè plurimos atque eximios verbi divini præcones alio opportuniore loco laudandos sibi vindicat apud Italos atque Hispanos Ordo noster.

(14) Præclarissimam inter *Franciscum Lutherumque* antithesim adornavit *Bellarminus* in Oratione de *Gloriâ miraculorum*: Hoc nostro seculo illo ferè tempore quo mortuus *Lutherus* sua zizania seminare cæpit, floruit in *Italiâ* alius quidem *Franciscus*, auctor & parens hominum illorum religiosorum, qui in *Galliâ* boni homines, in *Italiâ* Minimi dicuntur, qui tam multis & eximiis signis enituit, ut nullus sit ex veteribus eum quo meritò comparari non possit: Itaque eodem ferè tempore homines duo contrarii inter se extiterunt, *Lutherus* in *Germaniâ*, *Franciscus* in *Italiâ*. Multa deindè de *S. Francisco* & de Ordine nostro gloriose scribit *Bellarminus* quæ legi possunt loco

loco cit. At diversissima neque tamen nobis minùs gloriosa de nostro Instituto reliquerunt scriptores hæretici qui S. Fundatorem, nostramque familiam injuriis & calumniis aggressi sunt; atque maximam quidè id reputamus gloriæ nostræ partem. Neque de religioso splendore nostro aliquid detrahit quod de nobis scribere non erubuerunt audaciores quidam viri qui Catholicorum nomine gloriantur, inter quos *Polydorus Virgilius* in libro de *Inventoribus rerum*, ubi non solum Ordinem nostrum, sed religiosas quasque Societates aspernatus fastidiosè traduxit; de quo quidem *Polydori* opere satis erit referre judicium *Petri a S. Romualdo* in *continuatione Chronici*: *hominis hujus scripto quod de rerum inventoribus finxit, nihil extat nostrâ atate in lucem editum, pluribus quod scateat nugis, aut futilibus persuat conjecturis*. Porro tale judicium proculdubio amplectetur quisquis leget librum hunc putidis calumniis respersum.

(15) *P. Paulus Randeacius a Paterno* claræ apud Calabros nobilitatis; dum *S. Franciscus* in Galliis morabatur, Vicarii Generalis officio per Italiam functus est. Ità illustris fuit illius Sanctitas, Virtutibus miraculisque comprobata, ut *P. Franciscus Binetus*, paucis post obitum interjectis annis, de illo in Beatos referendo apud Summum Pontificem egerit, decretumque impetraverit ad persequendam de vitâ & miraculis inquisitionem. In *processu consentino* an. 1594. testata leguntur miracula plurima. In Comitiiis generalibus Romæ celebratis an. 1623. *Beatificationis* procuratio suscepta est; sed rerum domesticarum angustiarum demandatum negotium retardarunt & tandem urgente nostrorum conventuum religiosâ paupertate, interruptum omnino suspensumque hæsit; quod quidem sæpè nobis contigit; hac scilicet de causâ nobis aliquandò non licuit externam Sanctorum gloriam procurare multis ex nostris qui æterna gloria jam

jam donati piè creduntur Ejusdem nominis parisque sanctitatis fuit *P. Bartholomæus a Paterno* quem gloriosa morte defunctum an. 1586. tradunt tabulæ Siculæ; quæ plurimos quoque *S. Francisci* Socios tanquam miraculis claros referunt.

Matheus Michael inter primos Gallos qui Ordinem amplexi sunt, eruditione morumque sanctimonia clarissimus fuit; ut tradunt *Annales* nostri. Hunc Beatus Parens consiliis suis, scribendisque etiam epistolis peramanter & utiliter adhibuit. Eundem fuisse crediderim cum *P. Mathao de Barsigny*, qui *S. Francisci*, cum Turonibus esset, Socius fuit, ut legitur in vita *S. Francisci* ab auctore coetaneo conscripta. Hic autem *Matheus* cognomento dictus *Michael* in primis Comitibus generalibus inscribitur Socius provincialis Turonensis.

Franciscus Binetus ex nobili apud Gallos stirpe, amplissimis Regni muniis conspicua, in Monasterio Ordinis *S. Benedicti* quod *Mamurinum* vulgò dicunt *Prioris*, officio fungebatur; dum *S. Franciscus* Turones venit. At beati viri colloquiis ad Severiorem disciplinam revocatus nostrum Institutum professus est, ad cuius decus & incrementum tanta deinceps perfecit, ut alter veluti institutor habeatur. Primus post *S. Fundatorem* Ordinis nostri moderator generalis, hunc tanta sapientia per tres vices gubernavit ut dignissimus *Francisci* successor & tanquam alter *Franciscus* haberetur. De illius sanctitate tam præclara fuit opinio ut Cardinalis *Jacobus Simoneta Binetum* his verbis alloqui non dubitaverit: *Nunc quidem Pater, causam agis institutoris tui in sanctos referendi, erit cum pro te alius eadem operâ perfungatur*: obiit Romæ an. 1524. in cœnobio *SS. Trinitatis* ubi venerandum illius caput religiosè asservatur.

Bineto

Bineto fuffectus est *P. Germanus Lionetus* virtutum fama maximè commendatus. Quanta apud omnes valuerit existimatione satis loquitur illius funus religiosa pompa elatum, quod plurium Episcoporum & aliquorum Cardinalium præsentia decoratum est; magnum omnibus sui desiderium reliquit; Pontifex ipse *Lioneti* mortem comploravit, Patresque nostros alloquens hæc verba *Lioneto* gloriosissima protulit: *Magnum vos columen amisistis; ego verò bonum & justum amicum*: Hæc testata invenio in antiquissimis nostrorum Annalium monumentis. *Dionysi Barbierii* jam meminimus. Hic apud *Maximilianum* Imp. gratiâ & auctoritate valuit, Ordinemque nostrum sub his felicibus auspiciis per Germaniam propagavit.

Jacobus Lespervierius jam antea laudatus, virtutum exemplis non minùs quam indefessis laboribus Ordinem nostrum amplificavit. Encomii procul dubio maximi loco esse debet, quod is S. Patri fuerit carissimus, atque etiam in conscribendis epistolis gerendâque nascentis familiæ curâ utilissimus. Cæterùm hic, data occasione, observandum est *S. Franciscum* in scribendis litteris alienâ quidem manu sæpè usum esse; neque tamen putandum est eum scribere nescium fuisse, quod quidem effutiunt aliqui. Quanvis in *S. Fundatore scientiam sanctorum* unicè commendemus, certum tamen est non ità illiteratum fuisse *S. Virum* ut nequidem scribere aut legere noverit. Et quidem in processu *Calabrico* & *Turonensi* legitur *S. Franciscum* recitare solitum fuisse *Officium B. Mariæ*, *Septem Psalmos*, *Horas Canonicas*, eum in suo sermone usum fuisse omninò appositè textu *Sacra Scriptura* etiam latinè. Accedit constans inter nos traditio, pietatis & religionis ergò, *S. Fundatorem* admitti noluisse ad presbyteratûs Ordinem quem *Sixtus IV.* Summus Pontifex propriis manibus ei conferre optabat. Huic traditioni nostræ assentitur *Bailletus* ipse, licet severus traditionum censor. At quis crediderit Summum Pontificem conferre voluisse

luisse presbyteratum homini nulla litterarum cognitione prædito, qui ne legere quidem aut scribere calluerit? Quod spectat litteras quæ S. Francisci nomine circumferuntur, omnes supposititias esse temerè affirmant aliqui. Et certè cum *S. Franciscus* scribere noverit, litteras pro bono Ordinis sui regimine, scribere potuit & debuit. At cum multæ circumferantur litteræ a S. Francisci virtutibus alienæ, velut tanto auctore indignæ prorsus rejiciendæ sunt. Sed Beato Scriptori detrahi non possunt litteræ illæ quæ ab auctoribus coetaneis ei tribuuntur quales sunt nonnullæ. Ad litterarum illarum normam examinari debent aliæ simili testimonio destitutæ in variis bibliothecis dispersæ; si nempe eandem manum referant, si pietatem religionemque spirant, si tandem sermonis simplicitatem animique candorem præferant; hæ suppositionis argui non debent. Qui enim fieri potest ut epistolæ diversis in locis diversisque temporibus conscriptæ, eodem prorsus Charactere, eadem verborum simplicitate exarata, coetaneis testimoniis comprobata & *Francisco* assertæ, ad S. Auctorem non pertineant? Porro extant plurimæ his Characteribus munitæ litteræ, talemque epistolam, ut alias omittam multas, se religiosè aservare mihi pro suâ humanitate litteris significavit nobilissimus *Marchio Chifius* vir omni ex parte Clarus. Sed hæc obiter tantum & oblatâ occasione dicta sint; neque enim ad nostræ Orationis scopum pertinent.

P. Ambrosius de Jesu Hispanus virtutum omnium exercitio spectabilis fuit. Theologicis studiis excultus in Scholasticâ & Mysticâ tantum excelluit, ut vix parem habuerit. Mysticam verò non solum ipse altè imbibit, sed etiam in alios transfudit. Testis est religiosissima soror *Gratia Valentina*, tertium Ordinem nostrum professa & sanctitatis fama celebris quæ ab ejus disciplina prodiit. Testis quoque est *B. Ludovicus Bertrandus* qui prima spiritualis vitæ do-

documenta a nostro *Ambrosio* hausit. Rarum quidem mortis genus & viro Apostolico verè dignum divina benignitate *Ambrosio* concessum est. Cum enim *Valentia* pulpitem conscendisset, & de more, ad rerum divinarum contemplationem raperetur, conticuit & mortuo similis obriguit. Sublatus indè & in proximum cubiculum delatus, paulò post expiravit ann. 1541. Funus solemnì pompa celebratum est & tanto populorum concursu, quantus unquam in Urbe visus fuit post hominum memoriam. Tanta fuit *Ambrosii* celebritas illiusque sanctitatis gloria, ut ejus vitam scripto tradiderint non solum aliqui ex nostris, sed etiam de illo fusè scripserint exteri auctores non pauci inter quos honoris causa nominantur *Vincentius Justinianus* Dominicanæ familiæ moderator generalis & deinde a *S. Pio V.* ad Cardinalatûs dignitatem evectus. *P. Joannes Lopes Episcopus Monopolitanus* in vita *S. Dominici*. *P. Franciscus Didacus* in *Chronico Arragonia*; tandem *P. Seraphinus Razzi*, in vita *S. Ludovici Bertrandi*. Hi omnes scriptores *Ambrosium* nostrum eximiis cumularunt elogiis

(16) Primis Instituti nostri temporibus, religiosissima viguit sanctionis disciplinæ observatio ita ut populorum voce tot piè crederentur Sancti quot exiterant Societatis nostræ viri. Et requidem ipsa, præclarissimam de nostris hominibus concepam opinionem satis demonstrat summus ille civium applausus quo in Urbes admissi fuerunt primævi Sodales nostri. Ordinis nostri apud Summos Pontifices estimationem maximam satis loquuntur *Bulle* quibus decorata fuere religionis nostræ primordia. Sed hæc fusius persequi non sinit præscripta huic opusculo brevitatis.

(17) Multos inter religiosissimos viros a pristina Ordinis nostri Sanctitate minimè degeneres, procul dubio eminet. *P. Gaspar Bonus*, cujus virtutes ita fuere illustres ut in

Comitiis generalibus mafsiliæ celebratis ann. 1611. aliisque deindè univerſi Ordinis noſtri conventibus decretum fuerit, ut apud Sedem Apoſtolicam *Gaspari* in Sanctos referendi negotium omni ope ageretur ; quod quidem hætenùs tardiori ſucceſſu præſtitum fuit , non virtutum aut miraculorum ſed rerum domeſticarum inopia . Neque apud nos glorioſa tantum fuit venerabilis viri memoria ; ſed cum ad ſepulchrum magna conveniret hominum multitudo & unanimi voce teſtata audirentur miracula plurima ; id in cauſa fuit ut decernente *Illmo D. Joanne Ribera Patriarcha Antiocheno , Archiepiſcopo Valentino* *Gaspari* corpus Feretro conditum magnificè & eleganter pannis inſtratum, in privatum quoddam altare ſublatus ſit . Actum id anno 1609. ſolemni pompâ quam peregit Rmſus *D. Thomas de Eſpinosa Marrochianus* Epicoſopus . *Gaspari* laudes eleganti Oratione complexus eſt *Rev. D. Gaspar Eſcolanus* Regni *Valentini* Hiſtoriographus . *Gasparo* ſocium ſtatim ſubnectemus *Fr. Franciſcum a Longobardis* licèt multò recentioreſ & his ferè noſtris temporibus . Sed cum utriuſque acta ſupremo S. Sedis iudicio nunc ſubſciantur , & de illis venerandis viris ſanctorum Catalogo adſcribendis nunc agatur , hos quorum gloria communis eſt , in eodem loco numerare convenientiſſimum fuit .

Ad Ordinis noſtri laudem adjungere quidèſ ſatis foret nullam eſſe in familiâ noſtrâ Provinciam quæ viros Sanctitatis fama percelebres identidem proponere & prædicare non poſſit . Sed ut alios omittam innumerabiles, paucos eo loci recenſebimus . Turonenſis Provinciæ monumenta venerandam *P. Duanii* memoriam nobis reliquere . Is cum humanioribus litteris diligenter operam dediſſet, Romam ad-eundi conſilium iniiit in hac florentiſſima Urbe graviora ſtudia proſecuturus . Urbem appulſus viros litteratos doctri-
naque

naque insignes qui philosophicas Mathematicasque disciplinas privatim traderent mercede conduxit, apud illustriores homines ipsos etiam Enos Cardinales frequenter versabatur, omniumque admirationi extitit, ob præstantissimum ejus ingenium atque in juvenili adhuc ætate maturum & acre judicium. In Galliam reversus amplissimis opibus liberiorisque vitæ illecebris renuntians, Institutum nostrum amplexus est, tantaque virtutum omnium fama excelluit ut apud Magnates ipsos & optimates omniumque Ordinum cives, sed præsertim apud Augustissimam Principem *Annam Austriacam Ludovici XIII.* selectissimam conjugem, sanctitatis gloria maximè commendabilis fuerit. Hæc pientissima Princeps, dum *Turonibus* moraretur, *Duanium* frequens invisebat Religiosis ejus colloquiis fruitura. Neque privatis duntaxat vitæ religiosæ virtutibus excellens fuit, sed Theologica quoque doctrina, & divinæ eloquentiæ ubertate maximè valuit. Prophanæ facundiæ fucum aspernatus, rationum pondere, sanctioris vitæ exemplo atque auctoritate scelestissimos quoque viros ad meliorem mentem revocavit. Tot perfunctus religiosis evangelicisque laboribus obiit anno 1636. Mortis ejus nuntio in Urbem perlato ad funus plenis viis accurrit effusa civium multitudo qui pedibus oscula figerent, qui vestem qua indutus erat sibi certatim optarent, concisisque laciniis arriperent. Primarii Turonenses viri necnon omnium cœtum Religiosi homines, ejus exequias in venerationis testimonium publicamque significationem prosequuti sunt. Servantur in Plesseis Tabularis litteræ ab illustrioribus quibusdam viris ad nostræ familiæ homines datæ quibus tanti viri jactura deploratur, ejusque sanctitas maximè celebratur: patrata ab eo referuntur miracula plurima ... *P. Moreavins* vir fuit Sanctitatis fama Clarissimus. Extat ejus vita typis edita. Satis sit observare
cum

cum tanta virtutum miraculorumque gloria illustrem fuisse ut in Comitibus generalibus ann. 1629. actum fuerit de probanda atque promovenda apud S. Sedem Religiosissimi hujus viri Sanctitate. Hic *Suessione* natus est, opibus potens ære suo conventum nostrum Suefionensem fundavit, & seipsum deinde omni auro longè pretiosiore nobis tradidit. Suefione obiit ann. 1626. ab Illmo & Rmo D. *Le Gras Suefionensium* Episcopo, celebratæ fuerunt illius exequiæ, magna Civium frequentia exornatæ..... neque laudari satis posset, si harum annotationum brevitatis longiorem permetteret sermonem. *P. Nicolaus Barreus Ambiani* natus a. 1621. Hic liberaliter educatus, eloquentiæ artem Mathematicasque disciplinas apprimè didicit, sui que ingenii acumine omnium admirationem in se excitavit. Institutum nostrum professus, in studiis theologicis celerrimos fecit progressus; sua denique summa doctrina usus est tum ad domesticam nostrorum adolescentum eruditionem, tum ad promovendam in publicis concionibus fidei morumque sanctitatem. Nec sua contentus opera propriisque laboribus, sed fæminarum cœtum instituit quæ puellarum institutioni studiosè invigilarent, easque præceptis & virtutum exemplis informarent. Sapientissimis legibus hunc fæminarum Ordinem instruxit, & per universas ferè Galliæ provincias non sine magna utilitate propagata fuit hæc institutio. At quod hujus instituti maxima certè laus existimari debet, Illma Domina de *Main-tenon* ducentas quinquaginta nobiles Virgines pietati Christianæ in Regiâ domo Sancti *Quirici* formare meditata, eo fine duodecim ex fæminis illis scholarum magistris advocavit. Exantlatis tot laboribus pro aliorum utilitate, cælestem mercedem reportaturus obiit Parisiis an. 1686. tantam relinquens sanctitatis famam ut ad sepulchrum accurreret Regia civitas venerationis ergò sedibus suis excitata.

P. Hie-

P. Hieronymus Detienneus nobilissima apud *Aquisfoxtien-*
ses familia natus, in ipso ætatis flore institutum nostrum
 professus est, in quo illibatam duxit vitam, sancta morum
 simplicitate admirandam. In tractandis convertendisque per-
 versæ vitæ hominibus singulari gratia valuit, nullis parcebat
 laboribus ut eos ad spem, fiduciam, melioremque men-
 tem revocaret. Sed ipse qui prudentibus consiliis alios ani-
 mos sublevaverat, severiori scrupulosaque conscientia ita
 vexatus fuit ut in summam solatii necessitatem conjectus fue-
 rit; tandem extremos dies mentis tranquillitate serenos ha-
 buit, divinisque solatiis perfusus animam Deo reddidit
 an. 1712. Conscriptos habemus de ejus vita & virtutibus li-
 bros duos in quibus multa a religiosissimo viro prædicta le-
 guntur atque probantur. Extant selectæ ejus epistolæ quæ
 summum religionis pietatisque amorem spirant.

Breviorem vitam sed cælo maturam egit *P. Paulus*
Trouchet cujus vitam quoque habemus typis traditam. Hic
Arelate ex antiqua Patriciaque familia natus an. 1611., ul-
 timum diem obiit an. 1647. ardens sui desiderium ob mo-
 rum suavitatem & sanctimoniam reliquit; vita ejus sæculo
 obscura, sublimioribus virtutibus illustris fuit atque con-
 spicua; singulari veneratione a suis popularibus colitur.
 Innumerabiles inter nos extitere viri sanctitatis fama cele-
 bres; sed paucos ex multis appellasse satis sit.

(18) *Reverendissimum D. Didacum de Sylva* nobilem Lu-
 sitanum inter familiæ nostræ homines referunt annalium no-
 strorum Scriptores. Et jure quidem merito hunc illustrissi-
 mum virum sibi vindicat Ordo noster. Regnante *Joanne III.*
 habitæ fuerunt in Lusitaniâ publicæ de rebus fidei contro-
 versæ quibus *Didacum de Sylva* Ordinis nostri Theologum
 præesse supremâ auctoritate voluit *Clem. VII.* Pontifex Ma-
 ximus qui *Didacum* generalem, ut vocant, *inquisitorem* con-
 stituit.

stituit. Hunc Ordinis nostri alumnum fuisse fidem facit diploma quo *Clemens VII.* a *Joanne III.* Lusitaniæ Rege rogatus, hoc amplissimo munere *Didacum* exornavit. Diploma illud datum est vi. kal. Jan. 1531. hisque incipit verbis: *Cum ad nihil magis*: Sed cum eidem muneri *Didacus* noster aliquandiù vacasset, & in compescendis hæresibus quæ in dies gliscebant strenuam dedisset operam, Summus Pontifex hanc potestatem Nuncio suo adjudicavit datis ad Sanctæ Sedis Nuntium in Lusitaniâ litteris quarum initium est: *Venerabilis frater*: Sed Rex qui *Didacum* Religionis & doctrinæ famâ commendabilem summoperè charum habebat, cum Romam misit apud Sedem Apostolicam suo & Regni nomine qui Religionis statum referret. Romæ cum esset non tam Regis commendatione quam suo merito Summi Pontificis gratiam sibi conciliavit. Referunt *Freita* & *Paramus*, fidei & pietatis præmium a Summo Pontifice accepisse *Didacum* atque Episcopum *Septensem* eum fuisse creatum. Nec prætermittendum est duos extitisse in Lusitania ejusdem nominis, sed non ejusdem familiæ viros. Primus fuit *Didacus* noster, alter autem fuit *Didacus a Silva* ex Ordine Minorum *S. Francisci* qui *Inquisitoris* generalis officium administravit quoque. Hic anno 1534. *Septensis* Episcopus designatus est, & deindè anno 1540. Archiepiscopus *Braccarensis* renuntiatus; quas quidem dignitates duas certissimis documentis comprobatas invenio; quare si *Didacus* noster *Septensis* Episcopus fuerit, breviori certè tempore hac dignitate potitus est; cum ad hæc circitè tempora *Didaci* nostri obitum referant annales nostri, immo *Didacum* nostrum Romæ mortuum fuisse ex *Montoja* aliisque rerum nostrarum Scriptoribus colligi potest. Hic autem sine annotatione præteriri non debent quæ leguntur tom. xvi. annalium Minorum: *circa idem tempus* nempe 1535. *eum* nempe *Didacum* nostrum,

de-

*decessisse non improbabile judicat P. Franciscus Jacquier ejusdem familiae Scriptor annalium quem honoris causâ nomino: quæ quidem verba de me honorificentius dicta non ita debent intelligi quasi Didacum an. 1735. obiisse affirmaverim; si enim hoc ipso anno Didaci mors contigisset jam *Septensem* Episcopum hunc fuisse omninò repugnaret; nihil ergo aliud significare volui, nisi *Didacum* paucioribus annis post ejus Romam adventum ibidem obiisse, quantum ex nostris chronicis conjectari licet. Ita enim utriusque *Didaci* Episcopatus *Septensis* conciliari potest.*

Ordinis nostri decus imò & Cleri gallicani ornamentum fuit Rñus & Illñus *D. Renatus le Clerc* ex clarissima in supremo Parisiensi Senatu familiâ ortus. Hic institutum nostrum professus est in *Plessæo Turonum* conventu an. 1610., non solum omnia religiosi status officia præclare gessit, & *Ducatus Burgundiæ* provinciam dignitate provincialis, ut vocant, primus omnium decoratus, sapientèr gubernavit, sed apud Regem *Ludovicum XIII.* tantâ Religionis virtutumque omnium laude floruit ut anno 1627., ætatis suæ 37. Episcopus *Glandatensis* designatus fuerit & in nostrâ æde Parisiensi consecratus. Post multa Christianæ pietatis pastoralisque officii insignia opera an. 1651. è vitâ migravit & boni vigilantissimique Pastoris memoriam atque summum desiderium apud oves suas reliquit. In templo *Glandatensis* sepultus est jacetque sub obscuro & religioso marmore, sed præclarissimis laudibus exornato. Non solum religiosi virtutibus, sed vario etiam litterarum genere insignis fuit. Hujus sæpè honorificentissime meminit *Cartesius* cui familiarissimus fuit, & in eruditione Socius. Eundem quoque gloriosè nominant *San-Marthani in Galliâ Christiana*.

Illñus, ac Rñus *D. Franciscus de la Fare* in Episcopum *Regiensem* inauguratus fuit an. 1625. is nobilissima stirpe

oriundus, religiosi instituti simplicitatem natalium splendori anteponeus, familiæ nostræ nomen dedit. Theologus fuit eximius; in celeberrimis Hispaniarum academiis ad studia Theologica informatus, nativum Gallicæ gentis acumen cum hispanicâ gravitate in concionando conjunxit, & in eâ facultate inter paucos excelluit. Nostram *Provincia* provinciam gubernavit & ad supremum totius Ordinis regimen a multis expetitus; sed ampliori dignitati servatus, *Regiensis* Episcopus electus est. Verum non totos tres annos hoc sacerdotio functus, honorifica legatione ad res Cleri Regni-que componendas *Pictavum* profectus & in suam Urbem negotiis feliciter gestis rediens, vehementi febre attacktus, ad Archiepiscopatum *Aquensem* jam designatus, sublimiores dignitates in meliorem vitam commutavit.

Nostro *Francisco de la Fare* in *Regensem* Episcopum susceptus est an. 1630. perillustis vir *P. Ludovicus Donis d'Atichy* familiæ nostræ alumnus, qui ex officio provincialis, ut dicunt, Ducatus *Burgundia* ad *Regensem* episcopatum electus est. Hoc ipso anno delectus fuit ut apud Regem totius Cleri Gallicani causam ageret, quâ legatione ad optatum finem perductâ, ipse Cleri Gallicani nomine Regi gratias egit. Generis nobilitate conspicuus, rerum divinarum scientia excultus, pietatis & religionis amore præstantissimus, nihil habuit quod desiderare posset præter corporis vires; ecclesiæ suæ bono consecrandas; debiliori tamen valetudine conflictatus, nulli pepercit labori ad promovendam populorum suorum utilitatem. Verum cum puriori morum disciplina severè invigilaret, censurasque ecclesiasticas in aliquos perditæ vitæ homines infligere paratus esset, parum tuta fuit vigilantissimi Antistitis salus; quam ob causam ad Ecclesiam *Angustodunensem* translatus est. Circâ idem tempus, vita functo Esmo Cardinale *Richelio Lugdunensi* Archiepisco-

piscopo, *Ludovicus* noster pro antiquissimo Episcoporum *Augustodunensium* jure, *Lugdunensem* Ecclesiam vacante Sede administravit. Alio quoque Antistitum *Augustodunensium* privilegio, Comitibus Burgundiæ præfuit, & pro eorundem comitiorum solempni instauratione, coram Duce *Espernonio Burgundiæ* pro-Rege, adstantibus Provinciæ primoribus peroravit. Religiosissimi pastoris officia non solum implevit; sed etiam litterarum studiis summoperè deditus, varia reliquit opera inter quæ præcipuo loco numerari debent Ordinis nostri historia generalis Gallicè conscripta & opus aliud insigniorum Cardinalium elogia continens, tribus Voluminibus comprehensum. Ceterum quanto doctrinæ eruditionisque delectu libros conquiverit satis ostendit pretiosa atque numerosa librorum suppellex quâ nostram Ducatus *Burgundiæ* Provinciam locupletavit.

Necque in muneris Episcopalis exercitio minus illustris fuit Rñus *P. Gaspar Dinetus* qui cum ad Moderatoris Generali dignitatem expeteretur, *Matisconensis* antistes electus fuit. Dignitati probitatem, morum integritatem & suavitatem atque insignem dicendi facultatem summamque eruditionem conjunxit. Diocesim impigrè perlustravit nec sine fructu longè maximo, doctrinam moresque summa vigilantia curavit; Seminarium Clericorum erexit, aliaque scientiarum & bonæ disciplinæ adjumenta suppeditavit. *Henrico IV.* optimo clementissimoque Principi maximè gratus, ab eodem Secretioribus Regni arcanis adhibitus est, & rerum difficiliorum frequentibus litteris particeps factus. Comitibus Cleri Gallicani summâ laude non semel interfuit, atque in iisdem comitiis an. 1617. Lutetiæ celebratis ob facultatē gratiam ad Regem orator delectus est, apud quem, frequenti Clero comitante, pro Ecclesiâ Montepessulana a perduellibus hæreticis vexatâ atque oppressâ strenuè per-

oravit ; exultantem apud *Bearnenses* Catholicam Religio-
nem , direpta Ecclesiarum bona fortissimè conquestus est ,
& piissimum Principem ad vindicandam Fidei & Ecclesiæ
injuriam animavit . Et reipsâ Hæreticorum furorem longè
latèque compressit invictissimus Princeps , pacem Regno ,
Ecclesiis bona , Religioni Majestatem restituit . Is fuit for-
tunatissimus legationis exitus . Sed *Gaspar* noster *Matisco-*
nem reversus, Deo, sibi, commissæque gregi vacans, an. 1620.
occubuit non improvisâ morte quam tres ante annos , para-
to sibi jam sepulchro , expectabat , eâ in Deum fiduciâ
quam Divina misericordia puraque conscientia in Religioso
viro excitant .

Dineto nostro individuus Comes , & necessitudine quæ
virtutum similitudine coaluerat conjunctus fuit *Antonius*
de Boulogne qui Ordinem nostrum apud *Lugdunenses* pro-
fessus ad Ecclesiæ *Diniensis* regimen assumptus est an-
no 1602. Hanc Ecclesiam placidè ac Sanctè administravit
piissimus Antistes , mansuetudinis laude , morum integrita-
te suis Fratribus plebique suæ carissimus ; sed infirma ten-
tatus valetudine in dies ingravescente obiit anno 1615.
Corpus ejus *Dinia* in templo *S. Hieronymi* conditum est ex-
tructo lapideo tumulo cui hæret Clarissimi Viri effigies .
Antonium nostrum litteris ad *Mersennum* datis impensè lau-
davit Vir Clarissimus & R. D. *Petrus Gassendus* ejusdem
Ecclesiæ *Diniensis* Canonicus Theologus , Politiori literatu-
ra , doctrinæ varietate , & reconditoris philosophiæ scien-
tiæ omnibus notissimus . Gloriosam Antonii nostri mentio-
nem faciunt *Sanmarthani* , qui nobilem ejus stirpem ex
clarissima apud Italos *Capizuccorum* gente derivarunt .

Multos inter Ecclesiæ præfules qui Ordinem nostrum
illustrarunt , nulli certè secundus fuit Rñus D. *Gaschius*
Archipræsul *Panormitanus* . Vix primos adolescentiæ limi-

tes

tes egressus, nostro Instituto nomen dedit *Valentia* apud Hispanos. Humanis divinisque scientiis apprimè excultus, mirum quanta doctrinæ copia ac splendore sive in scholis docendo, sive in sacris pulpitis fideles ad pietatem informando refulserit. Juvenis adhuc ad suæ Provinciæ regimen assumptus, aliisque in Ordine nostro muneribus summa cum laude functus, tandem concordibus omnium votis summus Familiæ nostræ moderator renunciatus est. Vix elapso officii generalis tempore ad Archiepiscopalem *Pa- norini* sedem totiùs Siciliæ primariam evectus est. Episcopum induens, Religiosum non exuit, neque aliud sibi ex summa dignitate arrogabat nisi ut se omnibus patientia, religione virtutibusque superiorem ostenderet. Moerentium consolator, Pauperum Pater, pupillorum ac viduarum defensor, amplos redditus non pompæ & vanitatis, sed vestiendis nudis pascendisque esurientibus consecrabat; ipse solus egere exoptans egenos tam liberali manu sublevabat, ut in suis ædibus nihil esset quod religiosam paupertatem non redoleret, atque ipse sibi non solum non concederet superflua sed recusaret quoque necessaria. Deo & hominibus acceptus mortuus est in senectute bona an. 1729. Extat Illm̃i Præsulis nostri vita Italico idiomate conscripta in quâ sigillatim recensentur præclara illius gesta, atque etiam miracula quædam ab eo patrata referuntur.

Illm̃us D. *Franciscus Palancus* Instituti nostri in Hispaniâ fulgentissimum lumen, tanta floruit doctrinæ Theologicæ laude ut *S. Inquisitionis Censor*, Archiepiscopi *Toletani Synodalis*, ut vocant, examinatus & Vicarius Generalis assumptus fuerit, ac tandem *Panamensis* Episcopus electus. Quam merito hanc obtinuerit doctrinæ famam ostendunt plurima quæ typis edidit opera. De sublimioribus difficilioribusque Theologiæ argumentis nempe de *Fide Theologica*, de

de *Spe & Charitate* de *Providentia & humanâ libertate* atque de *Sanctitate Dei* tres in fol. libros conscripsit; eximium quoque librum reliquit de *Conscientiâ humanâ*. Tandem *Cursum Philosophicum* prælo dedit tribus voluminibus in qu^o. comprehensum. Hæc sunt præcipua *Palanci* nostri opera severiori scolasticâ metodo tradita, quæ summam in disputando argutiam nativamque gentis suæ subtilitatem demonstrant. Hæc autem opera non solum in utraque *Castella* in qua semel & iterum Provincialis moderator extiterat, sed etiam per universas Hispaniæ Provincias frequenti usu & maxima laude fuerunt propagata.

Ultra Annotationum fines longè excurrerem si vel ipsos illustriores familiæ nostræ Antistites vellem appellare, satis sit paucos ex multis brevius recensere. *Franciscum* de *Mayda* a *Paulo* Episcopum *Lavellensem* . . . *Gregorium* a *Paulâ* Episcopum *Neocesariensem* . . . *Raphaellem* *Pizzurnum* ex *Guardiensi* Episcopatu translatum ad *Sagonensem* . . . *Laurentium* de *Pedraza* Episcopum *Palentinum*, *Perniensem* Comitum & Hispaniarum Regi a consiliis . . . *Bernardinum* a *Fuscaldo* Episcopum *Oppidensem* . . . *Michaelem* *Stela* Episcopum, *Jaccensem* . . . *Josephum* *Perimezzum* Episcopum *Oppidensem*, deindè Archiepiscopum *Bostrensem* non mediocris doctrinæ virum qui varia reliquit opera inter quæ primum locum sibi vindicat *Cursus Theologicus*. Cæterum licet opus illud aliis id genus quæ antè edita fuerant operibus palmam non præripiat, ex eo tamen quamvis paulo festinanter conscripto licet cognoscere auctorem in rebus theologicis fuisse versatissimum. Paucos ex multis antistites nominavimus, sed longè plures extiterunt in familia nostra religiosæ simplicitatis viri, qui ultro delatas ecclesiæ dignitates non raro apud nos exemplo declinarunt; horum jam aliquos laudavimus, alios nonnullos deindè laudaturi.

(19) Ab

(19) Ab ipsis natalibus peperit familia nostra alumnos plurimos doctrina & sanctitate præstantissimos, quorum numerus crevit maximè cum ipso Ordinis progressu. Multos jam ab antiquioribus nostris temporibus perillustres viros numeravimus; aliquos iterùm adjungemus & quibus incrementis aucta fuerit gloria nostra, per temporum seriem demonstrabimus. *Rolandi Guichardi* memoriam ipsis *Theophili Raynaudi* verbis jam celebravimus; cum *Rolando* conjugii potuisset alter *Simon Guichardus*; quia tamen hic aliqua reliquit doctrinæ suæ monumenta quæ ad præsentem orationis nostræ locum magis pertinent, licet ambo fuerint virtutum meritis pares; utriusque elogia dividimus. De hoc quoque *Guichardo* nostro honorificè omnino scripsit laudatus *Raynandus*: *Simon Guichardus Ordinis Minimorum præfectus generalis xv. vir sanctus & linguarum Græcæ præsertim ac Hebrææ peritiâ clarissimus*; addere poterat (caldeæ atque Arabicæ) ut testantur plurimi quos earumdem linguarum in nostra Aquisextiensis bibliotheca reliquit codices manuscripti. Rerum usu & exquisita prudentia pollebat *Guichardus*; tanta doctrinæ vi & soliditate in refellendis hæreticis valuit ut *hæreticorum malleus* vulgò appellaretur; quo quidem glorioso nomine exornati fuerunt alii ex nostris. Interfuit Concilio Tridentino in quo orationem habuit tanto omnium patrum plausu exceptam ut Religiosum hunc virum ex *minimorum* Ordine, honorifica verborum lusione *maximum* omnes vocaverint. Neque solius *Theophili* elogiis commendatus fuit *Guichardus*, sed cum magnificis laudibus decorarunt alii Scriptores non pauci, inter quos doctissimus *Caninius* qui in sua linguarum Syriacæ, Arabicæ & Æthiopice grammatica *Guichardi* doctrinam virtutesque celebravit & ex ejus colloquiis se multum profecisse fassus est. *Guillelmo Duprat* Episcopo *Claramontano* magni ejusdem nominis Cancellarii filio

ca-

carissimus fuit *Guichardus*, atque inprimis Eñõ Cardinali *Turnonio* Lugdunensi Archiepiscopo acceptissimus; universas fere Galliaë provincias concionando perlustravit non sine fructu maximo; cum improbos homines non paucos ad meliorem vitam, hæreticosque nonnullos ad veram fidem revocaverit. At cum audivisset turpissimam Episcopi cujusdam ab Ecclesia defectionem, incestasque nuptias contrahendi nefarium consilium, eum adiens a proposito detertere atque ad bonum ovile pastorem reducere imperterritus, tota qua valebat doctrinæ vi, tentavit. Sed magnanimos Religiosissimi viri conatus gloriosa mors excepit; nefarius enim Episcopi Aulicus, potius dicam, Sicarius, magnanimum nostri *Guichardi* pectus gladii pila validè percussit, & optimum patrem Senio laboribusque fractum morti dedit anno 1574.

Iisdem ferè temporibus Lutheranorum Sectam validè aggressus est *P. Joannes Thierry* Lingonensis, in operibus Theologicis quæ Summis Pontificibus *Adriano VI.* & *Clementi VII.* nuncupaverat. Juris doctrina præstantissimus fuit; decretum *Gratiani* annotationibus plurimis locupletatum, & commodissimis indicibus instructum edidit; *Decretales* variosque de jure Canonico & Civili tractatus singulares sæpius recusos prælo commisit. Hujus Scriptoris nostri meminit *Possëvinus* in Apparatu Sacro Inter strenuos fidei & Religionis præcones numerari etiam debet *Michael Gorgen* qui in Theologiâ morali exercitatissimus non solum in Sacro Pœnitentiæ Tribunali fidelium saluti maximè studuit; sed etiam in Theologiâ dogmaticâ versatissimus cum hæreticis qui apud *Abbayennes* impia dogmata è suggestu spargebant, in arenam publicè descendit. Nec verbo tantum accerrimisque disputationibus adversus eosdem pugnavit, sed etiam scriptis quæ prælo parata, ingravescente senectute mortisque præoccupatus in lucem

lucem non edidit Huic adjungimus Tobiam *Eckart* in fidei controversiis versatissimum, qui in templo *Pragensi* Lutheri libros è suggestu perlegebat, tantâque doctrinæ vi refellebat ut Hæreticos plurimos ad Ecclesiam reducerit

Joannes Bruno è Scotiâ oriundus summa Theologiæ doctrinâ & disputationis subtilitate celeberrimus fuit. Plures Londini annos egit Catholicorum gratiâ quos non tantum in fide confirmavit, sed etiam hæreticos plurimos ad Ecclesiæ castra revocavit. Abdita S. Scripturarum Sacramenta summo studio indagavit. Linguam Sanctam apprimè callebat eamque publicè *Avenione* docuit; in linguâ Græcâ aliisque nonnullis Orientalibus linguis versatissimus fuit. Ad judæos Avenionenſes publicas conciones habuit tantâ Sacrarum Scripturarum vi eaque linguæ Sanctæ peritiâ ut plurimos Christo pepererit. Pauciores quidem & non magni momenti libros edidit, sed manuscripti codices quidam asservantur in nostra Parisiensi Bibliotheca, atque etiam alibi tanto viro digni, ita ut eos ad publicam utilitatem typis committi optandum ominò sit. Obiit Bruxellis an. 1645.

Brunoni adjungi debet *Jacobus Bonaventura Hepburnus* qui non solum Theologiæ fuit peritissimus, sed etiam incredibili ferè linguarum varietate exornatus. Edidit *Lexicon lingue Sanctæ* & alia quædam opera; sed præclara multa meditatus & nonnulla jam habens parata quæ prælo committeret, morte præventus est. Selectissimam habebat librorum suppellectilem quorum plurimi ad nostram *Pincianam* Bibliothecam pervenerunt *Hepburnum* excipit *Andreas Reale* Theologicâ doctrinâ linguarumque peritiâ maximè commendandus. Typis edidit linguæ Sanctæ Grammaticam quâ nullam novi faciliorem & ad hujus linguæ studium magis accommodatam. Suâ Hæbrei idiomatis peritiâ

studiosè ufus est ad refellendos judæos quos propriis armis debellabat .

Neque justis elogiis defraudari debet *Franciscus Lanovius* qui in Chronico Generali , illustriores nostros homines eleganti Sermone celebravit . Instituto nostro nomen dedit an. 1614. & eorum omnium quos ipse laudavit virtutes unus complexus est . Non solim religiosis moribus apud omnes clarus fuit ; sed fidem quasi superat admiranda quâ pollebat reconditoris doctrinæ varietas . Tantam elaboraverat & jam prælo paraverat librorum copiam ut Bibliothecæ loco esse potuissent . Operum catalogum nobis servavit clarissimus *P. Renatus Thuillier* in Diario nostro Parisiensi , quorum operum aliqua edita sunt , alia autem in nostra Parisiensi Bibliothecâ latent non sine magno Reipublicæ Litterariæ detrimento . Optandum maximè foret ut in lucem aliquando prodirent sequentia opera : *Concordantiæ Habreo Latina Veteris Testamenti quibus ad origines suas singula voces expenduntur , ratio diversitatis inter Hebreos & Latinos codices disquiritur , & vulgata editio Latina per minimos quoque apices examinatur , asseritur , vindicatur* : Harum concordantiarum jam ab anno 1629. editum est specimen aliquod ex quo universum opus cognoscitur & magnopere exoptatur . *Institutio Theologi quâ formantur prima ejus studia , tum methodi Concionum , controversiarum , Catechesum , casuum conscientiæ , prælectionum cum optimo genere interpretandi Scripturas prolixè traduntur & omnia Theologi officia pertractantur ... Theologia historica , seu origo , progressus , successus & incrementum doctrinæ Christianæ per consequentes seculorum ætates observata & digesta in quacumque materiâ theologicâ , ita ut in promptu esse possit quo primum tempore orta sit de quâlibet re quæstio , quid ultra deinceps circa eam fuerit observatum , dictum , anim-*
ad-

adversum, & quem denique in statum sit perducta Historia Ecclesiastica de seculo in seculum sub iisdem titulis disposita quibus Magdeburgenses suas centurias digesserunt, quo facilius & ipso quasi conspectu errores eorum & fallacia deprehendantur, arguantur & revincantur: Horum operum aliorumque bene multorum argumenta, necnon summa auctoris doctrina vehemens acuire debent desiderium ut locupletissimus ille rerum Theologicarum thesaurus in Bibliothecarum scriniis diutius non prematur.

P. Claudius Rangolius illustri apud Crespiacenses familiâ natus, in ætate jam adultâ Ordinem nostrum amplexus est. Non solum vulgaribus studiis sese dedit, sed Hebraicis Græcisque litteris apprimè eruditus, in Latinâ Gallicâque facundiâ nemini secundus fuit. Latinæ quâ excellebat insigne reliquit documentum in duobus commentariorum tomis quos in libros Regum edidit; illud quidem opus a sacrâ Indicis Congregatione, inter libros prohibitos iusta censûra relatum est, ob præfationes impiissimi hæretici Vermilii vulgò dicti Petri Martyris, iisdem Commentariis præfixas; at religiosus Auctor noster sanctæ Fidei tenacissimus Vermilii errores in operis progressu validè impugnavit. Gallicæ eloquentiæ quâ plurimùm valebat testes sunt illius ad populum Conciones tantâ eloquentiæ vi conscriptæ, ut serenissima Regina Margarita a Valefio Henrici Magni conjux hoc Regium pronunciaverit iudicium, se plurimos Oratores & quidem disertos audivisse, sed neminem Rangolio eloquentia præstantiorem. Vir fuit non inferioris Sanctimonie, illiusque elogium nullo possumus luculentiori testimonio absolvere quam verbis Mersenni nostri in Epistola ad Amicum data: Non absque lacrymis hanc Epistolam scribo, vir clarissime; cum enim Rangolii recorder quem Scio nuper decessisse, mediam istius Mundi partem amisisse mihi videor.

Hæc enim erat viri probitas, singularisque pietas, doctrina & eloquentia ut cum nullus alloqui aut illius uti familiaritate posset absque solatio. A laudato Viro Rangolium nostrum laudari satis est. Obiit die 3. Octobris ann. 1625.

In hâc annotationum brevitate non licet speciali laude prosequi illustres alios viros qui scriptis Sacrisque concionibus Ordinis nostri gloriam mirificè auxerunt, atque propagarunt; horum nomina vix appellabimus. *Joannes Cannartus* ex celebri Doctore Theologo Parisiensi, Canonico & Archidiacono Sueffionensi ad Ordinem nostrum transivit; plurima reliquit magni moliminis opera quibus ultima non accessit auctoris manus. Edidit compendium Rethoricæ sæpius recusum..... *Albertus Berutus*, Sacræ Theologiæ & Ecclesiasticæ Historiæ benè doctus, edidit *compendium Baronii*, & commentaria in *Summam S. Thomæ* jam paraverat... *Hilarion de Coste* non Theologiæ tantum sed Historiæ Sacræ & Prophanæ peritus fuit, conscripsit Gallico idiomate: *Historiam Catholicam sæculi xvi*; edidit quoque *elogia Regum Franciæ* *Joannes Baptista des Bois* Theologus insignis, linguarum peritiâ humaniorumque litterarum cognitione celeberrimus. Is cum tenui afflictaque valetudine perpetuo laboraret, multis quæ jam paraverat operibus ultimam manum admovere non potuit; controversiarum *Bellearmini* Epitomen summo Theologorum plausu exceptam edidit *Robertus Renaut* cujus meminit in Bibliotheca *P. le Long* in Theologia exercitatisimus fuit, Sacræ prophanæque historiæ peritissimus, controversiis inter Catholicos & Sectarios quæstionibus summam dederat operam, cujus hunc retulit fructum ut publicum certamen cum *Maillarto* pseudo evangelii ministro inire non dubitaverit, & hæreticum turpiter devictum suis quoque deridendum præbuerit. In conquirendis ab omni antiquitate numismatibus sedulum & di-

diligens studium impendit . Eo litteraturæ genere incensus iter in Orientem suscepit , multisque Imperii , ut vocant , *declinantis* numismatibus auctus est . Redux Parisios rei litterariæ promovendæ , & selectiori Bibliothecæ quæ eo auspice cæperat & creverat perficiendæ se totum dedit . Aliqua in lucem edidit opera , sed Commentario *de Sacris hominibus & Historiam Reginarum Francia* jamjam editurus , ejus consiliis mors præmatura intercurrit .

Hic data occasione *Roberti Renaut* qui peregrinationem litterariam in orientem suscepit , virum non inferiorem adjungam *Minutium Theophilum* qui dato familiæ nostræ nomine , non philosophiæ solùm ac Theologiæ operam dedit , sed etiam perdiscendis Græcæ & Hebraicæ linguis acerrimo studio incubuit , easque ita pulchrè calluit ut quot quot hujus litteraturæ peritiores suo tempore floruerunt , de ejus doctrina optimè existimaverint . *Marino Merfeno* , *Buccardo* , *Annibali Fabrotto* , *Gassendo* ac *Peirescio* fuit amicitia conjunctissimus . *Minutius* etsi nullo ingenii sui fætu Rempublicam litterariam ditaverit , de ea tamen optimè meruisse dici potest ; quippe qui pro ornando exquisitoribusque monumentis augendo celeberrimo per Orbem *Peireskii* musæo , eum diù multumque insudasse testis nobis est *Gassendus* in vita *Peireskii* . Verba *Gassendi* describam : *Peireskius misit in Orientem Theophilum Minutium ex Minimorum Ordine* qui uberiora (nempe sacrorum Bibliorum monumenta) requireret . Et sane spe suâ frustratus non est ; ille enim optima sorte comperit acquisivitque Biblia Samaritanica cum adjunctis in Tritaplorum formam Hebraicis Arabicisque , eodem scilicet Samaritanico charactere , idque præter duo testamenta Syriaca Arabicosque Codices complures . Adportavit etiam libros non paucos ac potissimum copticos , hoc est , charactere & idiomate *Egyptio antiquo* conscriptos . Advertit & Mumias
duas,

duas, cadauera, videlicet antiquissima illius & sumptuosissima conditura, quarum altera fuit præcipue grandis, integra, insignis, & quantum licuit ex ornamentis conjicere, principis viri. Attulit & numismata ex quibus existimavit retrodragmata duo, alterum Atticum, alterum Syrium ac numisma Hugonis Regis Jerosolimorum & Cypri. Anno 1632. codices Samaritanos misit Parisios Peireskius ut magnorum Bibliorum compleretur editio. Summam ex Minutii reditu capit letitiam Peireskius, ideoque eum iterato destinavit ut venatum iret libros Orientales, deditque in Comitatum Henrici Gornai Marchevilla Comititis, Oratoris Regii Constantinopolim discessuri. Attulit ex Oriente libros quam plures cum numismatibus variis ac Basilidianis præsertim, itemque Bulbosis plantis aliisque hujusmodi rebus. Inter cetera pretio habendum quoddam Volumen repertum intra capsulam ad Mumia pedes & magnam Græcorum Codicum copiam: Hæc Gassendus de Minutio in vita Peireskii. Ea deinceps Peireskium inter & Minutium invaluit necessitudo ut illorum neuter absens ab amico vivere posset. Clarissimo Peireskio in extremis adstitit Minutius, eique ultima Religionis & amicitiae officia administravit.

Insignes alios Concionatores celebresque Theologos paucis verbis attingam. Ex hoc munere sunt, ut alios omittam longè plures qui recenseri possint: *Petrus Blanchot* Orator eximiusque Theologus a quo prodierunt opera duo præcipua: *Bibliotheca Concionatoria SS. PP. & Idea Bibliotheca Universalis* *Joannes Morales* gravissimus Theologus & Historiographus cujus opera aliqua manuscripta se oculis usurpasse testatur *Lanovius* eaque dolet typis non fuisse edita. Sed Historiam Provinciæ *Batica* lingua sua Hispanica conscriptam habemus *Franciscus Tamayo* in Tribunali Cordubensi S. Inquisitionis Qualificator & consultor,

tor, qui deinde ad Supremum Inquisitionis consilium vocatus est, inter celeberrimos ætate sua concionatores annumerandus, in primariis Hispaniæ atque Italiæ subfelliis omnium admirationem excitavit *Nicolaus Lesguillier* è vetusta & copiosa *Lesguillieriorum* gente in Gallia, qui non solum studiosam juventutem nostram per longum tempus ea imbuuit Theologica doctrina quam hauferat a suis doctissimis Magistris *Gamacheo*, *Isamberto*, *Hennequino*; sed etiam aliqua edidit opera, nempe *Paraphrasim Epistolarum S. Pauli ad Romanos*, *ad Hebreos* & *secundæ ad Corinthios*; item *opusculum de ratione studiorum*. Illius dictio elegans est & nitida; politiori enim litteraturæ, Poetarum atque Oratorum lectioni assiduam dederat operam *Mathurinus Aubert* Gallus qui *Pii V.* Summi Pontificis nomine, visitatione Apostolica per Gallias functus est, ut adversus insurgentes & pullulantes novas hæreses animos suorum obfirmaret, quod præstitit eximie. Redditurus Pontifici Maximo rationem eorum quæ gesserat, Romam reversus, ibidem sedem fixit, & magno apud Romanos in honore extitit ob functam egregie Legationem Apostolicam. Pontifici ipsi longè acceptissimus fuit, qui priusquam Pontifex fuerit *Auberto* nostro suam conscientiam crediderat. Commendatur in Conventu Generali *xvi 1.* ob summam rerum agendarum solertiam, diligentiam & fidem *Robertus de S. Gilles* ex illustri apud Normannos stirpe, illustriora Galliæ pulpita concionum suarum fama implevit *Antonius Duflos* ex nobili apud atrebatenses familia natus in liberalibus litteris summa cura institutus, Philosophiæ & Theologiæ apprime doctus, utramque facultatem in Romana Urbe explicavit, summo omnium applausu. Cum moraretur Romæ, animadvertit pro eo privatim agi de Episcopatu, idque suum Fratrem summo desiderio expetere. Verum homo
nil

nil nisi æternitatem cogitans de hac re nulla verba audire voluit, & omnia fratris amicorumque suorum consilia elisit *Petrus Guerinus* eximius orator fuit, hunc concionantem audivit *Henricus IV.* librum conscripsit *de residentiâ Episcoporum*. Guerini nostri meminit *Edmundus Richerius*; quod quidem eo nolim dictum consilio quasi aliquid laudis *Guerino* nostro indè accedat; sed ut *inimici* quoque *nostri sunt iudices* *Petrus Hebertus* Ordinis nostri moderator generalis, vir fuit pietate sincera, virtute solida, doctrina singulari in concionibus, suavitate in convictu & colloquiis commendabilis. *Adurensem* episcopatum ab *Efpernonio* Duce cui semper magna in veneratione fuit, ultrò oblatum constanter recusavit *Ægidius Cammartus* qui fuit quoque moderatur Generalis, Hebraicè, Græcè & Latinè doctus, sacræ facundiæ fama maximè floruit. . . . *Antonius Finetus*, virtutum exemplo, eruditionis & eloquentiæ gratia clarissimus, verbo ita potens fuit ut adversùs hæreticos qui Tolosæ invaluerant fortis & acer pugnaverit, eosque, pro concione, validè profligaverit. De eo præclarè meminit *Georgius Bulquerus* Senatus Tolosani jurisconsultus in opusculo: *de Hæreticorum profligatione* *Petrus Pijart* frequentissimæ auditorum scholæ Sacram Theologiam summo omnium applausu tradidit. Duos insignis hujus Magistri discipulos honoris causa nominamus *Joannem Franciscum Molezzannum* qui Martyr in Anglia occubuisse refertur, & *Antonium Rutaum* scriptis plurimis Clarum. *Pijartius* varia edidit opera inter quæ palmam sibi præripit: *Bibliotheca Sanctorum & Antiquorum Patrum concionatoria*. Hujus Bibliothecæ pars maxima transivit in *ædicularium Bibliothecæ Concionariæ SS.PP.* quod edidit doctissimus *P. Combesfius ex Dominicanorum familiâ*. In nostra bibliotheca Parisiensi asservantur ejusdem auctoris commen-

tarii

tarii in epistolas S. Pauli, quod quidem opus ità perfectè elaboratum judicant viri docti, ut illud in lucem prodire vehementer exoptaverint.

(20) Enarrare longuis esset ad hanc usque ætatem pietate & doctrinâ præstantissimos viros qui Ordinis nostri gloriam sustinuere; unaquæque Provincia prædicare potest ad recentiora usque tempora religiosissimos homines omni virtutum genere percelebres: paucos ex multis appellabimus ex quibus his quoque postremis temporibus familiæ nostræ veluti specimen capere liceat. Speciali memoriâ dignissimus est *Franciscus Giry* qui patrem habuit *Ludovicum Giry* in Senatu Parisiensi secretioribusque Regis consiliis patronum, Gravioribus licet curis distentus Ludovicus, litterarum studia assiduè coluit: nondum instituta erat Parisiis Academia quæ a linguâ vernacula nomen habet; præclarissimos ingenioque excellentes viros sibi socios adjunxit D. Giry qui linguæ nostræ leporem atque elegantiam perficerent. Quare in paterna domo veluti nata dici potest percelebris Societas illa, quæ ad servandam procurandamque cultiotis Sæmonis puritatem nunc maximè floret, in quam cooptari certatim ambit quantum est hominum è primaria nobilitate litteras amantium. Quæ cum ita sint, mirum non est quod *Franciscus* noster paternis curis institutus, virtutis doctrinæque rudimenta unâ cum lacte veluti hauserit. Philosophiam ac Theologiam summa cum laude per plures annos docuit; neque tamen dogmaticam scholasticamque Theologiam ità studuit discipulis exponere ut *Mysticam* negligeret, atque in suis lectionibus id semper intendit ut sui auditores fierent quidem doctores, sed amorè Dei ferventes. Morum innocentia, affabilitate spectatissimus fuit, pietatem qua ipse imbutus erat aliis instillare sollicitus libros edidit veræ pietatis sensu refertos. Imprimis verò: *colloquium Christi* et anime
H Chri-

Christiana : alterum librum prælo mandavit : *centum humilitatis capita* complectentem, qui clarissimæ D. *Ducissæ de Vantadour* ita probatus fuit, ut eum proprio sumptu typis iterum dandum omnibusque gratis distribuendum ipsa curaverit. Præterea, ut alia omittam opera nonnulla quæ serenissimæ Galliarum *Delphine* cui semper gratissima exiterunt, dedicaverat, inter omnia potiori sanè loco numerari debent *acta Sanctorum*, elocutionis nitore & religiosæ, non tamen intemperantis, Critices delectu opus perfectissimum; hæc acta, ex præcedenti P. *Simonis Martin* editione, adornaverat P. *Giry* atque hanc iterum editionem auxit & locupletavit P. *Raffron, Francisci Giry* in suis laboribus virtutibusque imitator. In vitis illis quæ sunt nitido Sermone conscriptæ laudem præcipuè merentur dissertationes in Sancta Religionis nostræ mysteria....

Nicolaus le Febvre d' Ormesson ex domo splendida copiosaque ortus, Thologus & concionator fuit eximius. Tantam prudentiæ opinionem apud omnes sibi comparaverat ut Illūsus D. *Franciscus Harlaus* Archiepiscopus Parisiensis ipsi demandaverit plurium in Urbe Lutetia conventuum moderationem atque reformationem : onus difficile quo præclare functus est. Magna quoque in sacris Concionibus valebat facundiâ, edidit orationes plurimas quarum præcipuè sunt, S. *Ludovici Francorum Regis oratio panegyrica*; *laudatio funebris Annæ Austriacæ Reginæ & matris Ludovici XIV*.... *Antonius de Boyenval* vir fuit præstanti eruditione clarus : plurimos reliquit manuscriptos codices qui doctrinam illius paremque pietatis amorem testantur. Aliqua tamen edita sunt opuscula : *de divitiis salutis* : *civis Sanctorum* : *amaritudo mortis dulcissima* ; ultimum hunc librum tanti fecit *Armandus Card. de Richelieu* ut in dies sub noctem unum ex eo caput sibi prælegi juberet : ex *Sandro* *Carolus Franciscus Amounet* Bruxellensis Apostolico munere diversis quinque idiomatis functus

aus est & tanto quidem plausu ut a serenissimo Principe *Joanne Austriaco*, a *Serenissimo Archiduce Leopoldo* non sine admiratione auditus fuerit, atque etiam inter ordinarios ut vocant, Regiæ Catholicæ majestatis concionatores cooptatus. Non inani facundia ornatæ erant illius conciones, sed sublimiori Theologiæ doctrina & SS. Patrum documentis roboratæ . . . *P. Philibertus Bressand* tanta floruit Sacræ eloquentiæ famâ, ut ad verbum Dei fidelibus annuntiandum in præcipuis patriæ suæ *comitatûs Burgundiæ* subselliis per Senatus posceretur & obtineretur. Ad Belgium deindè perrexit ubi mox in prædicatorem Regium adoptatus, harum Provinciarum Gubernatoribus, viris Principibus, Ducibus aliisque omnium Ordinum nobilibus, non tantum a confessionibus, sed etiam in rebus maximè arduis a secretis consiliis fuit. Per adventus & quadragesimæ dies singulos quadraginta annis in Civitate Bruxellensi conciones habuit, tanto minimèque interrupto nobiliorum civium concursu ut plusquam 150. rhedæ perpèpe numeratæ fuerint.

Multos jam recensuimus his etiam temporibus doctrina Theologica percelebres viros quibus adjungemus *Antonium Baucat* amplissimæ institutionis Theologiæ auctorem; quod quidem opus licet aliis id genus operibus non antecellat, virum tamen in doctrina Theologica versatissimum satis probat. Præstantissimos certè his etiam temporibus ostendere possemus Theologos qui vel modestiæ ergo; vel aliis de causis suam doctrinam apud nos premere, & intra Religionis nostræ aut Urbium limites manere voluerunt . . . Anno proximè elapso accepimus mortem *P. Pons* qui *Matriti* apud Hispanos non solum doctrinæ Theologiæ fama sed Hebrææ & Græcæ linguarum notitia maximè floruit. Nobilibus primariisque viris acceptissimus fuit, atque ego ipse audiui nobiles viros & optimos literaturæ Judices

qui cum inter primarios Hispaniarum litteratos viros numerare non dubitaverint ; vir fuit severioris disciplinæ tenacissimus Paucos ante annos in Italiâ obiit *P. Galvanus* qui , licet publica non reliquerit doctrinæ monumenta , summam tamen apud optimos Judices reportavit nominis celebritatem : omnium loco sit *Benedictus XIV.* Pontifex Maximus quem de Galvano honorificentissimè loquentem audiui , cujus quidem judicii exceptione omni majoris illustre dedit testimonium , cum *Galvanum* nostrum Illmo Præsuli de *Auriâ* ad *Francofordiensia* comitia legato & deindè ad Sacræ Purpuræ dignitatem evecto socium singulari delectu adjunxit . In Academiâ Bononiensi Historiam Ecclesiasticam per multos annos publicè docuit , in qua quidem facultate non solum excelluit , sed etiam dexteritate ingenii ac acumine maximam existimationem apud primarios Urbis cives sibi comparavit Iisdem ferè doctrinarum insigniis exornatus aliquos antè annos vixerat *P. Studendolius* qui in Collegio de *Propaganda Fide* , Theologiam docuit & deindè studiorum præfectus assumptus est . *Clemens XI.* Pontifex Maximus hunc Theologum adjunxerat Illmo Præsuli *Bentivoglio* in Gallias Legato , & postea Cardinali . Apud omnes Galliæ Antistites magnam existimationem sibi comparaverat ; Romam & ad sua studia reversus multos reliquit manuscriptos Codices quos ad Cardinalis *Besozzii* manus pervenisse certo scio , hosque nunc latere suspicor in Bibliotheca Monasterii quod *S. Crucis in Jerusalem* Romæ appellatur .

Inter nos invenio jurisprudentiæ peritissimos viros complures quorum aliqui jam appellati fuere . Porro non de eâ loquor jurisprudentiâ quæ in forensi strepitu posita est & a Religiosi Instituti pace abhorret ; sed eam intelligo facultatem quæ Ecclesiasticas civilesque leges complectitur ,
 seu

feu quæ Ethicam Christianam civilemque politiam continet. *Isidorus a Messanâ* facundissimus Orator fuit & Canonici juris doctissimus. Edidit librum cui titulus: *Rationale Sacrorum Canonum*: *Isidorum* appellare non dubitat *Trimarchius* Italiæ decus. *Hieronymus Trimarchius* Theologiæ jurisque Canonici fuit peritissimus. Aliqua in lucem dedit opera quorum præcipua sunt: *de horis Canonicis*: *de præceptis Ecclesiæ*: *de methodo studendi*: alios qui de legibus tractabant libros se vidisse testatur *Lanovius*, sed ii lucem non aspexere. . . . *Lucas de Montoya* qui Ordinis nostri chronicon conscripsit, Theologus fuit præstantissimus & juris præsertim *Regularis* apprimè doctus. Inter varios libros a *Montoya* editos eminet opus in quo explicatur *Sensus Metaphoricus omnium locorum S. Scripturæ*. Sed dolendum est hunc excellentissimum auctorem prælo non commisisse alia duo opera quæ summo studio paraverat. Primum est de quo scribit ad *Mersennum* nostrum, nempe continet: *vitam Cardinalis Ximenii*, *Complutensis litterariæ Reipublicæ monumenta*, *leges*, *facultates*, *claros viros*. Alterum opus quod immensi laboris est, inscribitur: *Index universalis totius S. Scripturæ & SS. Doctorem & PP. Latinorum & Græcorum in quo singula quæque summaris & argumentis disquiruntur*.

Laurentius de Peyrinis de jure *Regulari* multos conscripsit libros, quibus non solum sese versatissimum probat in Sacris Canonibus & *Regulari* disciplina, sed etiam theologiæ moralis doctissimus. *Stephanus Isnard* Sacris Canonibus & monasticæ disciplinæ assiduam dederat operam. Hic auctor est opusculi cui titulus: *Codex Minimorum*: illustris quoque orator fuit; typis editas reliquit Sacras conciones plurimas Gallico idiomate. . . . *Gaspar Passarellus* Theologus & Jurisconsultus peritissimus varia typis dedit opera

ra quorum præcipuum est: *Summa casuum conscientie*
Adeodatus Lomellinus Sacræ Theologiæ jurisque scientia
 apud suos Genuenses celeberrimus fuit, & merito quid-
 em. Prælo paraverat: *Summam casuum conscientie: & an-*
notationes in Concil. Trid.

Joannes de Malras utriusque juris peritissimus fuit,
 licet nulla scriptis consignata supersint doctrinæ suæ mo-
 numenta. Is comes fuit Regii, ut vocabant, consistorii,
 sub Francisco I. atque ex hoc amplissimo munere ad Mi-
 nimorum Ordinem transire voluit. Ita spectata erat illius
 virtus & probè perspecta in rebus administrandis dexteritas,
 ut in ipso ætatis flore in totius Ordinis Antistitem
 electus fuerit. Sub Magistratus sui finem Malrasius noster,
 mandato Henrici II. Regis qui ejus in rebus agendis periti-
 am noverat, Romam profectus est de gravibus Regni
 negotiis apud Summum Pontificem acturus. Hac Regia
 procuratore vix perfunctus & Parisios reversus supremum
 diem piè obiit.

(21) In ipsis familiæ nostræ primordiis insignes habui-
 mus Mathematicos, in Sacris Studiis non minùs versatos.
Trimarchius noster laudat *Paulum a Messanâ* tanquam ce-
 lebrem Mathematicum; nulla tamen in hoc scientiarum
 genere edidit opera; sed typis mandavit vitam *S. Franci-*
sci de Paula versu heroico conscriptam. Tanta apud suos
 Messanenenses elegantioris Poeseos fama floruit ut, veteri mo-
 re, lauream coronam publicè retulerit, Alterius quoque
Bartholomæi a Messanâ meminit *Trimarchius* qui *Bartholo-*
mæo aliqua tribuit de rebus mathematicis opera; sed hæc
 nos latent.....*Franciscus Humblot* ob vitæ sanctitatem do-
 ctrinamque theologicam jam antea laudatus nec satis lau-
 dandus, in Mathematicis disciplinis egregiè versatus est.
 Postquam ille *Viroduni* undè oriundus erat, humaniores
 lit-

litteras altè imbibit , tredecim annos natus *Mussipontem* moxque *Trevirim* profectus , operam daturus Philosophiæ ac Mathesi quas tanta ingenii celeritate arripuit , ut è discipulo Magister sphæram manu gestans depictus sit & per *Germaniam* circumductus . Insigniores deindè peragravit Galliæ Academiæ in quibus jurisprudentiæ , Medicinæ , Theologiæ Doctor singularim renuntiatus est . Viginti quinque annos nondùm natus trium facultatum laurea donatus , reconditori eruditione tantum sibi nomen fecit ut ab Academiis *Tholose* & *Salmantica* publicas lectiones explicaturus deposceretur & ingentibus stipendiis alliceretur . Sed ostentationem divitiarumque despiciens ut Deo se totum daret , instituto nostro nomen dedit , & eam sanctè gessit vitam quam alio loco narravimus . Religiosa litterariaque colloquia frequens habebat cum Augusta *Margaritâ Valesiâ* cujus jussu composuit Matheſeos Elementa, quorum explicationem ab ipso *Humbloti* ore excipere atque audire solebat Regina ipsa . Hæc tamen elementa typis edita non fuere , sed plures alios habemus doctissimi auctoris libros , varias nempe conciones funebresque orationes , atque opus aliud quo Eucharistiæ dogma adversus Calvinianos vindicatur . *Mersennus* noster explicans cap. iv. *Genes* ex *Humbloto* repetit methodum quâ utebatur ad scientias in concionum usum transferendas , quam quidem licèt tenuitèr ille libaverit , ex eo tamen specimine promptum est intelligere quanta & quam præclara animo versaret *Humblotus* quæ lucem haud dubiè aspexissent , nisi mors quam alibi descripsimus uno fatali ictu illius consilia atque opera perculisset Antequam ad alios progrediar Mathematicos toto orbe celeberrimos hic statim subjungam *P. Joannem de S. Lo* parentibus claris & in arte bellicâ conspicuis natum . Parentibus suis in militari scientia

tia nihilo impar, in castris Regiis egregiè meruisset Majorumque suorum gloriam sustinuisset, nisi oblatam sibi fortunam contemnens, uni Deo militare satius duxisset. Mathematicæ disciplinæ adeò ipsi in amore & deliciis erant ut in iis labores impendisset omnes, nisi *sapiens ad sobrietatem* in scientia theologica qua excellebat, majorem collocasset operam. In Mathefi tamen haud mediocritè versatus fuit, atque ingenii formam habebat ad illud studiorum genus maximè idoneam; hujus scientiæ voluptate ità rapiebatur ut de eâ loquens gaudio exilire videretur. Artibus & Mechanicis laboribus oblectationis causâ, aliquando operam dabat. De his tamen disciplinis nihil scriptum reliquit; sed in Actis SS. a P. *Francisco Giry* in lucem emissis extant lucubrationes aliquæ nostri *Francisci de S. Lo* quas testatur Auctor in operis proloquio a se descriptas fuisse quales ex primi Scriptoris manu prodierant.

Marinus Mersennus vir raræ doctrinæ, scientiarum varietate insignis atque admirabilis, in rebus Mathematicis & musicis excellentissimus, in Philosophicis ac Theologicis argumentis versatissimus, & variarum linguarum peritissimus. Præclaris animi ingeniique dotibus æquè præditus fuit; ea præstitit morum simplicitate ut puerilem ingenuitatem referret; hunc rariorem quem in suis moribus expressit candorem legere est in præfationibus quas operibus suis præfixit; singula verba religiosum ingenuumque hominem demonstrant. In Collegio *Flexiensi* humanioribus litteris operam dedit, & deindè ad Philosophiæ Mathefisque studia se totum convertit; studiorum Socium habuit *Cartesius* & litteraria necessitudine ad mortem usque conjunctum. Peraçto literario curriculo, Parisios venit, & Theologiæ stadium in celebri Sorbonico Lycæo ingressus est, eximios optimosque studiorum Moderatores & Magistros
audivit

audivit *Gamaſchaum*, *Durvallium*, *Iſambertum*: his munitus doctrinæ præſidiis de capeſſendo vitæ genere cogitavit, a quocumque abhorrens vitæ inſtituto in quo aliqua rei familiaris & domeſticæ procuratio ſuſcipienda eſſet; quare Ordinem noſtrum in quo eam quam tantoperè amavit ſimplicitatem obſervaverat, amplexus eſt, atque per plures annos ſummam quam hauſerat doctrinæ copiam apud nos propagavit. Cum doctiſſimis viris litterarium fovebat commercium, omniumque exiſtimationem & amicitiam ſibi conciliabat. Vix ullus erat in Urbe muſices peritus, aut ſcientiarum politiorisſque litteraturæ ſtudioſus, aut etiam ingenioſus artifex qui Merſenni noſtri conſilia & præcepta non captaret. Nemo ex eruditorum natione Pariſios accedebat, qui cum adire atque audire officio & honori non haberet. Neque intrâ Urbem aut Gallias ſeſe ejus fama celebrataſque continebat; non ſolum illius nomen omnes longè latèque regiones pervaſerat; ſed ipſe etiam in Italiam, Germaniam Belgiumque iter litterarium inſtituerat, doctos eruditosque viros conveniens, ſtudioſè obſervans omnia ex quibus aliquod capere poſſet eruditionis & doctrinæ incrementum, atque maximam apud litteratos omnes ſui ipſius commendationem relinquebat. Nullius quidem momenti ſunt, & recordatione nullatenus digna cenſeri debent leviora facta quæ hominum vulgo contingunt; ſed quidquid magnis viris accidit, etiamſi parvum ſit, aliquam tamen magnitudinis partem veluti acquirit. Quare duo quæ Merſenno noſtro obſtigère, exigua licet, hic enarrare non pigebit. Merſennus Leodio profeſtus Coloniam, haud longè Leodio in nefarios prædones incidit a quibus peſſimè habitus, non pecuniâ tantùm emunctus eſt, ſed ad cutem uſque ſpoliatus, in paleâ perdiù deliteſcere coactus eſt; donec tandem naſtus beneficium ductorem ſalvus & in-

columis, subministratis vestibus, eò quo tendebat deductus, ibique honorificè exceptus illatæ injuriæ oblitus est. Aliud quid simile expertus fertur Antuerpiam pergens, in ipso Urbis aditu creditus explorator ab hostibus veniens, tunc enim bellum agebatur, per tumultum frementis Plebeculæ datus est in custodiam & in turrim conjectus, ubi noctem exegit. Postridiè adfuit excubiarum præfectus apud quem quis esset professus, vocatis qui cum nossent è nostris qui in ea Urbe sunt, multo cum honore ac præteritæ injuriæ deprecatione in domum nostram reductus est: tantum persæpè est scientiæ commodum ut aliquando viri docti nullo alio commeatu quam nominis sui celebritate muniti, viam sibi patefecerint. Ex suis itineribus hunc fructum reportavit Mersennus ut frequentissimum cum viris litteratis commercium epistolicum servaverit, atque religiosa illius cellula velut ditissimum Reipublicæ litterariæ emporium existerit. Multa reliquit eximia opera quorum præcipua sunt: *Quæstiones celebres in Genesim: Harmonicorum libri: de sonorum causâ, causis & effectibus: cogitata Physico-Mathematica: impietas Deistarum & Atheorum expugnata: veritas scientiarum*: Quod libros Theologicos spectat, dicere ausim ea quæ Mersennus suscepit argumenta a clarissimo Autore tractata fuisse tantâ doctrinæ ubertate, ut quidquid deindè dixerint Scriptores alii, in hoc nostro faciliè reperiantur. Quod autem attinet Philosophica opera; apud Viros musices peritos tanti pretii sunt quæ de hoc argumento conscripsit ut aliis quæ hæcenus editæ sunt hæc in re lucubrationibus longè præstare videantur. In promovendis quæstionibus maximâ pollebat ingenii dexteritate suisque interrogationibus sollicitavit multorum problematum solutionem & præsertim *Cycloidis* proprietates, quæ quidem in universâ ferè mathesi utilitates maximas producere.

re . Mersenni nostri memoriam commendant celeberrimi Scriptores ; eum in suis litteris amicè & honorificè tractavit *Cartesius* , illius vitam conscripsit *Hilarion de Coste* ; multa quoque ad Mersennum pertinentia edidit *Bailletus* in vitâ Cartesii .

Emmanuel Maignanus apud Tolosates nobili familiâ natus inter primarios ætate suâ litteratos viros numeratur . In rebus Theologicis , Philosophicis & Mathematicis pari magnoque successu versatus est ; quam quidem doctrinæ varietatem demonstrant egregia illius opera quorum hæc sunt præcipua : *Philosophia Sacra* : *Cursus Philosophicus* : *Catoptrica Gnomonica* ; Quod spectat Philosophiam Sacram , hæc continet nonnullos Sacræ Theologiæ tractatus , accuratâ methodo conscriptos . Eandem methodum spirat cursus Philosophicus cui nonnullas adjunxit quæstiones Mathematicas quæ autoris doctrinam ostendunt . Sed reconditior ejus scientia in disciplinis Mathematicis , luculentius apparet in opere *Catoptrico* . Cæterum observari debet Matheſim eo tempore ad eum non perductam fuisse perfectionis gradum ad quem pervenit hæc nostrâ ætatæ ; sublimioris enim Analyseos auxilio destituti erant hujus disciplinæ studiosi ; ac de litterariis hominum meritis prudens rectumque fieri non potest judicium , nisi ad eam in qua floruerunt ætatem revo-centur , & , ut ita dicam , retrahantur . Verum cum nævis suis non careant magni quoque homines , qui semper homines sunt , prætermittere non debemus opusculum quoddam a Maignano nostro conscriptum : *de usu licito pecunie* : quod quidem aliqua continet Sanioris Ethicæ Principiis , non satis consentanea . Hinc in librorum prohibitorum indicem relatus legitur libellus ille . Cæterum quanto in honore fuerit Maignanus apud suos Tolosates satis loquitur illius effigies in publico Urbis Palatio asservata . At alium quemlibet

honorem longè superat illa exiftimationis fignificatio quam Magnano noftro demonftrare fuma clementia non deditus eft Ludov. XIV. qui Tolofa tranfiens, Religiofiffimum doctiffimumque virum invifit, ejusque modeltiam non minùs quam doctinam miratus eft.

Joannes Francifcus Niceronius vario litterarum genere præftans fuit, fed in opticis præfertim excellens. Summam illius his in rebus peritiàm domonftrat opus cui titulus eft. *Thaumaturgus opticus*: in quo perfpèctivæ præcepta difficiliora explicantur & facili ratione demonftrantur. Subtili valebat ingenio judicioque firmiſſimo, in rebus agendis tractandisque expeditus fuit; quamquidem laudem Niceronio tribuit P. Francifcus Lanovius qui Galliam viſitaturus cum ſibi in collegam adſcivit. In rebus Mechanicis & in ipſâ etiam Machinarum fabricâ verſatiffimus fuit, difficultumque instrumentorum ipſe propriis manibus artifex. In tam excellenti ingenio magnam ſpem collocaverat Ordo noſter, immo & univerſa Reſpublica litteraria; at cum vix 33. annos natum præmatura mors præripuit.

Carolus plumier in rebus Mathematicis Maignani diſcipulus fuit; quamvis in Mathefi Theoreticâ fuerit non mediocritè verſatus, in Mechanicis exercitiis præfertim valuit. In teleſcopiorum, microſcopiorum, ſpeculorum cauſticorum conſtructione exercitatiffimus fuit: ſed in arte *tornatili* mirâ pollebat dexteritate quam luculentè teſtatur eximium opus de hac arte conſcriptum. In Botanicis peritiſſimus fuit, tantaque erat ejus doctinæ fama ut ad Regem ipſum Ludovicum XIV. pervenerit, cujus magni Principis jufſu in Americam laborioſum utiliſſimumque iter tertio ſuſcepit, ut exoticas plantas in noſtram Galliam transferret. Quartum iter in Americam aggreſſus ut arbo-rem quam corticem *Quinquina* appellant examinaret, obiit
in

in portu *Gaditano* qui *Sancta Maria* dicitur . De plantis Americanis eximia duo reliquit opera ; at de Bonanice plurimos habemus manuscriptos Codices qui in Bibliothecâ nostra Parisiensi asservantur . Ego ipse vidi Parisiis in musæo viri clarissimi *Antonii de Jussieu* . Botanices possessoris Parisiensis , multa de exoticis plantis a Plumierio nostro conscripta opera , de quibus hoc testimonium , gloriosissimum quidem , audiavi ab hoc iudice doctissimo , se nihil unquam legisse in hac materiâ accuratius , nihil majori descriptum diligentia . Porro quamvis manuscripti Codices illi in privata *Antonii de Jussieu* Bibliotheca lateant , pertinent tamen ad Academiam Regiam Scientiarum Parisiensem quam Rex litterarii hujus Theauri hæredem suprema auctoritate instituit .

Fevilleus rerum Astronomicarum peritissimus , indias Occidentales Regis jussu semel & iterum profectus est . Itinerum suorum historiam duobus voluminibus in 4. comprehensam typis edidit ; multa ad Astronomiam , historiam naturalem , Physicam atque Botanicen spectantia accuratè in hoc opere describuntur . Sumptibus Regiis in Conventu nostro Massiliensi, turrim ad siderum contemplationem accomodatam extrui & machinis affabrè elaboratis instrui curavit . Observationes plurimas manuscriptas reliquit ; sed hæc ad Regiam Parisiensem Academiam fuerunt transmissæ , multasque penes se retinere mihi significavit dum Parisiis agerem , D. Le Monnier celeberrimus Regiæ Scientiarum Academiæ astronomus .

22. *Maignani* discipulus fuit *Saguentius* qui magistri sui philosophiam ad methodum Scholasticam revocavit . Alia nonnulla typis edidit opera quorum præcipua sunt de *Speciebus Eucharisticis* ; & opusculum cui titulus : *Systema pe-
stis* . Rerum Geometricarum mediocritè doctus ; sed linguas hæbream , & Græcam apprimè calluit ; manuscriptum reli-

reliquit *Lexicon Hebraicum* : & typis edidit *Homilias Summi Pontificis Clem. XI. e Latino Græcè redditas*, & quidem eleganter.

Saguentii discipulus fuit *Iosephus Roma* qui magistri sui doctrinam deseruit ; Cartesianæ enim philosophiæ fuit acriter addictus . Hanc publicè per plures annos docuit in *Regio Taurinensi Lycæo* ; ingenii sui acumine , subtilitate & singulari facundiâ non solum estimationem civium omnium sibi conciliavit , sed etiam *Victoris Amedei Regis , Caroli Emmanuelis* nunc feliciter regnantis gratiam singularem promeruit . Tantam sibi pepererat doctrinæ , prudentiæ & sapientiæ laudem , ut Rex sapientissimus *Romam* nostrum *Eugenio Principi , Sabaudæ* familiæ pignori inclyto studiorum morumque rectorem adjunxerit , tantum ejus mentis maturitati confidebat . Sed antequam tantâ doctrinæ gloriâ *Taurini* floruerit , nondum tricesimum annum egressus Philosophiam atque Theologiam *Romæ* docuerat , eâ quidem laude ut apud Em̃um Cardinalem *Annibalem Albanum* Clementis XI. Pontificis Maximi Nepotem Theologi titulo atque officio decoratus fuerit ; ad quem quidem honorem non ambitu gratiæ irrepserat , sed eâ litteraturæ famâ quam ingentem ex Latinis , Græcis , Hebraicisque litteris sibi comparaverat . Incredibili ferè Latini sermonis elegantia valuit , Græcam quoque linguam ita perfecte callebat ut elegantissimè scribere potuerit . In chartis meis latent litteræ a *Româ* nostro mihi Græcè datæ , tanta quidem sermonis elegantia ut linguam Græcam non minus quam Latinam didicisse videatur . Dolendum sanè quod annos natus nondum quinquaginta præmatura morte creptus fuerit , dum jam communibus omnium votis , supremus Ordinis nostri moderator designabatur

Multos inter Ordinis nostri viros doctrina Mathematica
illu-